

# ROMÁÁNO

## Róómáari íjcyáame éllevu Páávoru cáátúnuháámi

### *Duurúvaju*

<sup>1</sup> Oo Páávoru o íjcyáábekée Píívyéébe picyóó Jetsocríjtoj téeveri mepájtyetéiñe méema dibye méénúné uwááboju úwááboobéré o péhíjcyaki. Aabe íñe íhyaami ó caatúnú Jetsocríjto ñcúve múnáajpi o íjcyáabe.

<sup>2</sup> Mekée ipájtyetétsoíñe tsúúcajátújuco Píívyéébe íhjú uubáalle múnáaj téeveri cáátunúné íwaajácúháámitu. <sup>3</sup> Aanéhjáa Ílli Jetsocríjto Máavyéjuube tsííjú icyánéjcutu míamúnáajpi Dabiíúvúj tsíménémúhaabe íjcyáábej téeveri méenuúbe. <sup>4</sup> Aabée dsíjíveebe tsiíñe bóhíñetu méwaajácú ímiááné Píívyéébé Hajchi íhtsútuube dibye íjcyane Cáání icyánéjcutu.

<sup>5</sup> Áábej téeveri meke ímíbájchoobe méhdi ñdáátsóvénema. Áánemáa meke pícyoobe dííbyé uwááboju úwááboméré mepéhíjcy panévá ínújñe múnáake diityédítýú cáhcujtsómé teene iúráavyeki. <sup>6</sup> Aane muurá tsúúca ámuha tsaate dííbyeéjté méijcyá Róómá múnáadítýú Píívyéébe ámúhakyé tújkevélélléméjuco. <sup>7</sup> Ááme éllevu íñe íhyaami ó caatúnú ámúhakyéé iwájyúnélli dibye újcúme éllevu. Aabe ihdyu Máavyéjuube Jetsocríjtoj téeveri óví ámúhakyé panévatu píaabó ímí ámuha méijcyaki.

*Róómávu Páávoró ipyééíñeri íjtsámeíñe*

<sup>8</sup> Muurá ímí Píívyéébeke ámuha meúraávyéné uubállé tsúúca pahúllevá múnaaré waajácúhi. Áánéllíi ámúhá hallúvú mítyane ó téhdútsohíjcyá Píívyéébeke Jetsocríjtoj tééveri. <sup>9</sup> Áábeke ó íícúvehíjcyá Íllídityu íjcyané uwááboju o úwáábóneri. Aabe waajácú ímiáané ámúhá hallúvú dííbyeke piáábó o táúmeíhijcyáne. <sup>10</sup> Áhdure ó táúmeíhijcyá díbye ímíllécooca ámúhakye o ááhívetéki. <sup>11</sup> Mítyane ó íjyácunú ámúhakye o ááhívéíyóneri íñe dííbyeke meúraávyejíjtó éhniíñevu ámúhakye o úwáábo ímí ámuha meúraávyeki. <sup>12</sup> Ehdu ó íjtsámeí tsaméhjí panéjcvávú mepiáábójcatsí ímí dííbyeke mecáhcújtsoki.

<sup>13</sup> Aane, ámuha, táñahbémuke ó úúballé mítyane ámúhakye o ááhívetéíyóneri o íjyácunúhíjcyároobéi ámúhakye o ááhívetétúne. Ó imíllé ámúhadítúyú tsíjtyeke Píívyéébedívú o wáájácútsóné muhdú pahúllevá múnáá pañe o méénuhíjcyádu. <sup>14</sup> Muurá táhallúrí teene díbyéé Jetsocríjtoj tééveri mééma mepájtyetéíñe méénunévú pamévakéré o wáájácútsóiyóné íhtsútujtémáyé ídáátsojtéke. <sup>15</sup> Áánéllíi mítyane ó imíllé ámuha Róómá múnáake o úúballéné díbyéé mééma mepájtyetéíñe méénune.

*Ímiáájú meúraavyéné menúcojpíilletúne*

<sup>16</sup> Aabe tsá o núcojpíiletú Críjtodítúyú ímiáájú íjcyane o úwaabóné íhtsutúnée Píívyéébe mewájuryi méénune íjcyanéllíihye. Aane pámeere cáhcujtsómé pájtyéteé jodíómuu, jodíómú íjcyáturómee,

íjcyame. <sup>17</sup> Ááné uwááboju meke waajácutsó muhdú ímiááné Píívyéébeke mecáhcújtsómeke dibye ímiáámedíyjuco díllone. Muurá dííbyé waajácúháámitu nééneé: “Píívyéébeke cáhcújtsómeke ímiáámedi dibye díllome pájtyéteéhi.”

### *Míamúnaa ímityúné íjcyane*

<sup>18</sup> Muurá ímityúné ícyahíjcyámedívú icyááyóbáne diityedí ícúbáhráiibye ímiáájú ímíllétumé téeneriyé tsúúrámehíjcyáné hallútu. <sup>19</sup> Muurá waajácúromé Píívyéébeke dííbyere ímiááné íjcyane bóhówátsohíjcyánetu. <sup>20</sup> Muurá dííbyeke maájtyúmitúrónáa méwaajácú dibye íjcyane páneeréé múhdúné tsíeméné dibye ípívyéjtsónetu. Aane ímiááné tsá tene téévéturó mújyú níjkéváítyuube dibye íjcyane íhstútuúbe. Áánéllii ímíllédú ícyahíjcyámé tsá nééítyuró dííbyeke iwáájácútúne. <sup>21</sup> Iwáájacújúcóóróóbeke tsá ditye ávyejúúllehíjcyatúne. Tsá ditye téhdútsohíjcyatú dibye diityéké panévatúré píáábohíjcyárónáaáca. Tehdu imyéénúíyótsihvu ítsámehíjcyámé átéréénéhjiri. Aame ídátso teene ímityú pañe ícyahíjcyá ímíaaane wáájacútúme éhne múu cúúvétsii íjcyadu. <sup>22</sup> Aame ídátso bañuháñé némeíhíjcyá waajácu múnaa íjcyane átéréejte íñeubará wáájacútúme íjcyame. <sup>23</sup> Muurá Píívyéébe mújyú muhdú íjcyáítyúúbedi íícúvetúme míamúnáama páhduvaré néené iyámé ‘tsucátsúcá’ íjcyáítyúme náávé íñíjcyone díllóhíjcyá

Píivýéébedi. Ánehjíréduurúvahíjcyámé ímiáábeke idyúúrúváiyótsihvu.

<sup>24</sup> Áánéllii diityéké ílluréjuco dibye íhvejtsóné ditye awáá ímillédú íjcyaki. Aame méénuhíjcyá panévare núcójpítsó nénehji.

<sup>25</sup> Ehdu méénuhíjcyámé ímiáájú díbyé uwááboju icyáhcuújtsóiyótsihvu állíuháñéré icyáhcuújtsónéllíihye. Aame díbyeke dúúrúvatúmé kéénerá dibyee ípívyéjtsónéhjíréduurúvahíjcyáhi.

<sup>26</sup> Áánéllii diityéké íhvéjtssoobe ditye awáá ímillédú núcójpítsówu íjcyaki. Muurá tsamééré walléemú dómácócatsíhijcyáhi. <sup>27</sup> Téhdure tsamééré wajpíímú dómácócatsíhijcyá núcójpítsówu wálléemuma íjcyáiyóné ímíllétúnema. Áané níjcaúvú muurá ícúbáhrámehijcyáme.

<sup>28</sup> Muurá Píivýéébedi ditye íícuvéjúcóótúnéllii awáá íhvéjtssoobe diityéké ímityúneréjuco ditye imyéénu imyéénúityuróne. <sup>29</sup> Ahdújuco muurá páhduvaré néené imityuháñé ditye méénuhíjcyáne. Mítyane íéhnéváyóneri íjyácunúhijcyáme. Ihdícyáméhjima dómácócatsíhijcyáme. Nomíutáavahíjcyáme. Dsíjivétso múnaa íjcyame téhdure állíu múnaa. Caayóbame. Átéérénehjiri ihjyúvahíjcyáme. <sup>30</sup> Píivýéébeke íéhdíiválléne tsíjtyedítýú nehníwu íhjyúvahíjcyáme. Uuhívatépíwu néeme itsúcunúmelhijcyá íhtsutúmé íjcyane. Ímityúnéré imyéénúíyóneri íjcyame tsá cáánímuke icyáhcuújtsóiyóné ímíllétúne. <sup>31</sup> Wáájácúmeítýúmé imyéénúityúnéré íhjyúvahíjcyáhi. Muucá iwájýútúnéllii tsá ditye múhdí ídáátsóvehíjcyatúne.

32 Waajácurómé ehdu néémeke Píivýéébe wáágóoíñe. Árónáa éhniíñevúré tehdu dáríivemeihijcyáme. Ááneréi ijcyáronáa tsijtye ímityúné íjcyane duurúvahíjcyáme.

## 2

### *Míamúnaa íjcyanéjuco Píivýéébe nééneé*

1 Aane ámuha diityédúré menééme jíveekí múhdurá ditye íjcyáneri méihjyúvahíjcyáhi? Tsá ámuha menééítyuró diityédú ámuha menéétune. Muurá tsijtye ímityúné íjcyáneri ámuha méihjyúvahíjcyámé hallúrí téhdure íjcyané ímityúné diityédúré ámuha menéénéllíihye.

2 Muurá méwaajácú múhdurá ícyahíjcyámema teene Píivýéébe ímbájchoíñe. 3 Ámuháubá méjtsúcunú ímityúné tsijtye íjcyáneri ámuha téhdure menééme méihjyúvahíjcyámé mepállójcoíñe Píivýéébe pámeemáyé muhdú ditye ícyahíjcyané ímbájchócooca. 4 Muurá múhajchótájucó dibye ámuhá imítyúcoba áábúcuhijcyané ámuhakye iwájyúne teene ámuha méihvéjtsóne ímiánejcúvuréjuco mepájtyéroki. 5 Árónáa jíveekí tsá ámuha méihvejtsópityú teéne? Áánéllíi íllure ámuhá hallúvú líiyájkímyeíñe Píivýéébe icyáyobáávatécooca míamúnáama teene ímbájchócooca ámuha téené déjúcotu meícúbáhrámeíñe. 6 Téijyu pámeere méújcuú muhdú meícyahíjcyáne áhdo. 7 Muurá dííbyé avyējú múijyú níjkéváítyúneri tsúúrameíhijcyámé dibye ímillédú íjcyámeke

ájcüiibye múijyú ditye dsijivéjúcóóityúne bóhívu. <sup>8</sup> Áánetu teene ímíletúmé ímityujíjtóré úráávyehíjcyámeke icyááyóbáne waagóoiibye ditye ícúbáhrámeííhyullévu. <sup>9</sup> Muurá jodíómuma tsijtye jodíómú íjcyátúrómédityú pámeere múhdumé ímityúné ícyahíjcyámé ícúbáhráméííhi. <sup>10</sup> Áánetu diityédityú ímí Píívyéébeke cáhcújtsómeke ávyéjuutétsóiiibye tsaímiyéjuco dííbyema ditye íjcyaki.

<sup>11</sup> Muurá tsahtúré meke wájyuube pámeekéré míamúnáake. Tsá dibye tsaatéké múhdurá íjtsúcunútúne. <sup>12</sup> Árónáa dííbyé taúhbajúu Moitséeúvudi íjcyane muhdú nééne wáájácúturómé ímityúné méénuhíjcyámeke waagóoiíbye. Muurá teene taúhbaju muhdú nééne wáájácúturómé waajácurá íjtsaméiyi keená ímityúné íjcyane imyéénúityuróne. Áánetu teene wáájácúturómé ímityúné ícyahíjcyámeke awáá tééné déjúcotu waagóoiíbye. <sup>13</sup> Muurá teene wáájácúturómé tene néhdu íjcyátúmeke tsá ímiáámedi dibye díllotúne. Tene néhdu íjcyámekéré dílloobe ímiáámedi. <sup>14</sup> Muurá tsaate jodíómú íjcyatúmé teene wáájácúturómé íííbúwaríyé tehdújuco ímí ícyahíjcyáne. <sup>15</sup> Íííbúwaríyé muurá waajácúmé muhdú múu ímí íjcyane. Áhdure waajácúmé ímityúné íjcyane. <sup>16</sup> Muurá Píívyéébe Jetsocríjtoj tééveri míamúnáa muhdú ícyahíjcyáné ímíbájchoó muhdú ámúhake o úwáábóne o néhijcyádu.

*Píívyéébé taúhbaju jodíómú úraavyéne*

17 Áronáa ¿íveekí ámuha jodíómú Píívyéébeéjté meíjcyámedi dííbyé taúhbaju íjcyájúccóóneúvuri mémítýákímyeíhíjcyáhi? 18 Aame ímiááne ámuha méwaajácúrá kéjijtó meúráávyéiyóné díbye ímilléne. Muurá dííbyé taúhbájutu keená ímiááne, ímityúnee, íjcyane tsúúca ámuha méwaajácúhi. 19 Áánéllii ámuha méitsúcunúmeíhíjcyá téjijto wáájácutúmé éhne múúne hállúvatúmé íjcyadu néémé túkevéjtojte ámuha meíjcyane. 20 Ámuha méjtsúcunúmeí dííbyé icyánéjcu wáájácutúmé tsímédúréi néémé uwáábojte ámuha meíjcyane dííbyé taúhbaju ámuha mewáájacújccóóneúvuri. 21 Muurá ámuha méúwáábohíjcyá tsíjtyeke. Áronáa ¿íveekí tsá ámuha meícyahíjcyatú ámuha méúwáábohíjcyádu? Muurá ámuha méúwáábohíjcyá menáníváítyuróne. Áronáa ¿íveekí ámuha ménánihíjcyáhi? 22 Áhdure ámuha méúwáábohíjcyá ihdícyáméhjima medómácójcatsítyuróne. Áronáa ¿íveekí ámuha méméénuhíjcyá teéne? Áhdure ámuha ménéhíjcyá níjcyotájteke mecááníváítyuróne. Áronáa ¿íveekí téhdure íívane ámuha díityé duurúvajaáne pañétú tsíeméné méékéévehíjcyáhi? 23 Muurá ámuha dííbyé taúhbaju mewáájacúneri memítýákímyeíhíjcyarómé tsá tene néhdu meíjcyatúne. Ááneri ámuha tsá maávyejúúletú Píívyéébeke. 24 Téénetu muurá dííbyé waajácúháámítu nééneé: “Ámuha jodíómú meíjcyarómé ímítýú meícyahíjcyánetu jodíómú íjcyatúmé néhni ihjyúvahíjcyá Píívyéébedítýu.”

25 Muurá dííbyeéjté meíjcyáné uubállé

mekíhdyahírótsámeiyómé dííbyé taúhbaju néhdu meíjcyátúhajchíí tsá íínetú meke tene píáábotúne. Aame ihdícyamédúré meíjcyáhi. <sup>26</sup> Muurá jodíómú íjcyatúmé kíhdyahírótsámeityurómé dííbyé taúhbaju néhdu íjcyámeke dílloobe ihñéjtedi tsíjtyere íjcyarómeke. <sup>27</sup> Áánetu mee jodíómú meíjcyarómé ménéétsáméíí díityédívú ímichi mééma teene taúhbaju íjcyaróné ímí meúraávyétúnéllííhye. <sup>28</sup> Muurá Píívyéébeéjté meíjcyáné uubállé mekíhdyahírótsámeíjyúcoorómé dííbyé taúhbaju néhdu meíjcyátúhajchíí tsá dííbyeéjté meíjcyatúne. <sup>29</sup> Muurá ihdyu dííbyeke ímí cáhcujtsómé díbye ímillédú íjcyame ímíááné dííbyeéjte. Áámeke ímí íjtsúcunúúbé tsáijyu múúne míamúnaa ímítyú íjtsúcunúrómeke. Tehdu Píívyéébe hállúejpi meke íítejeíívari. Muurá ihdyu ímichi ííteebe méííbúuri muhdú meícyahíjcyáne.

### 3

<sup>1</sup> ¿Aca meke píaabóné jodíómú meíjcyane? ¿A téhdure meke píaabóné mekíhdyahírótsámeííne? <sup>2</sup> Ímíáánéhde meke píaabóné íínee íuwaábojívú ímichi meke díbye níwááveííñúmedítyú tene bóhówaúcunúnéllííhye. <sup>3</sup> Árónáa íjcyámé tsaate dííbyeke ímí úráávyetúme. ¿A ehdu tsaate múhdurá dííbyeke úráávyénéllíi tsáhájuco díbye ímíáábé íjcyáityúne? <sup>4</sup> Tsáhaá, muurá ihdyu ímíáábé dííbye. Áánetu mee míamúnaa állíu múnaa. Muurá dííbyé waajácúháámitu nééneé:



Píivýéébe u íhjuváné tsá álliu íjcyatúne. Áábedítýú tsá múha nééítýuró ímítýuube u íjcyane.

<sup>5</sup> Muurá ímítýúmé meíjcyárómeke Píivýéébe wájýúnetu méwaajácú ímiáábé dibye íjcyane. Árónáa tsaate nehíjcyá ímítýuube dibye íjcyane, ¿íveekívá méimítýú hallútú méhdi ícúbáhrahíjcyaaabe téénetu ímiáábé dibye íjcyane bóhówaúcunúnáaaca? ¿A téénéllii ímítýuube dííbye?

<sup>6</sup> Tsáhaá. Muurá ímítýuube íjcyaca tsá dibye muhdú meícyahíjcyáné mééma ímíbájchóítýuróne.

<sup>7</sup> Áhdurévá álliu múnaa meíjcyánetu ímiáábé dibye íjcyane bóhówaúcunúnáa ¿íveekí meke díllóhíjcyaaabe ímítýúmedi? <sup>8</sup> Áánélliihyéubá ímítýúmeréjuco meíjcyáiyóné méimítýú mééma iníjkéva ímiáánevu. Ehdu muurá nehíjcyáme. Áhdurévá ímítýúné o úwaabóné nehíjcyámé óhdityu. Árónáa álliuré teene ehdu óhdityu ditye néhijcyáne. Muurá ihdyu ímiááné tehdu méénuhíjcyámé wágóóóveéhi.

### *Míamúnaa ímítýúné íjcyane*

<sup>9</sup> ¿Aanéhaca muhdú teéne? ¿A mee jodíómú ímiáámé tsijtye jodíómú íjcyátúmé ehniíñevu? Tsáhaá. Muurá méwaajácú pámeere míamúnaa ímítýúmé meíjcyane. <sup>10</sup> Muurá Píivýéébé waajácúháámítu nééené:

Tsá tsaatéubaré míamúnáadítýú ímiáámé íjcyatúne. <sup>11</sup> Tsá múha ímíletú Píivýéébeke ícyáhcujsóne. <sup>12</sup> Pámeere muurá dííbyedi íícúvetúmé ímítýúné pañe íjcyame tsá

wáájácúmeítyúne. Áánéllii tsá tsaatéubaré ímiáámé íjcyatúne. <sup>13</sup> Muurá diityé íjtsaméi nehníwu éhne múúne níkyehéjú nehníwu cúvahdu. Aame allíúwu néeme íhyyuváné meke tútávajtsó éhne múúne ííñimyé namíjtyá meke tútávajtsódu. <sup>14</sup> Tsanééré ímityúné imíllémé íhyyuváne. <sup>15</sup> Aame ímí íjtsúcunú míamúnáake múu dsíjívetsóne. <sup>16</sup> Ehdu idyáííwéjcatsíñeri íllure kímóvétsócatsíhijcyáme. <sup>17</sup> Aame tsá wáájácútu ímí íjcyáiyóne. <sup>18</sup> Áhdure tsá ditye íllityú Píívyéébeke.

Ehdu néene Píívyéébé waajácúháámitu míamúnáadítyu.

<sup>19</sup> Muurá méwaajácurá muhdú dibye ímillédú meíjcyáiyóné taúhbajúu dibye mééma méénúnetu. Árónáa tene néhdu meíjcyámejíí tsá menééityuró ímiáámé meíjcyane. Áánéllii pámeere míamúnaa ímityúmé meíjcyá Píívyéébedívu. <sup>20</sup> Muurá dííbyé taúhbaju meúraavyémé ímiáámé meíjcyane meíjtsúcunúmeíyómeke tsá dibye díllotú ímiáámedi tene néhdu meíjcyátúnéllííhye. Íllure téénej tééveri méwaajácú ímityúmé meíjcyane.

*Jetsocríjtoke mecáhcújtsóneríyé mepájtyeténe*

<sup>21</sup> Tsá Píívyéébe ímiáámedi meke díllotú ítyaúhbaju meúraávyérómeke. Muurá dííbyé waajácúháámitu íhyyú uubáalle múnaa meke úubáalle íínetú meke ímiáámedi dibye díllone. <sup>22</sup> Muurá ihdyu Jetsocríjtóo mewáajyuri dsíjívéné mecáhcújtsómeke díllóobe ímiáámedi. Árónáa

idyé tsá apáámyekéré meéke. Muurá ihdyu pámeere míamúnaa múhdumé dííbyeke ímiááné cáhcújtsómeke dílloobe ímiáámedi tsaatéke múhdurá íjtsúcunútuúbe. <sup>23</sup> Muurá pámeere míamúnaa ímityúné meméénume tsá Píívyéébe ímillédú meíjcyatúne. <sup>24</sup> Áronáacáa meke mítyane ídaatsólléne Jetsocríjtoj téeveri ímiáámedi dílloobe múhdumé dííbyeke mecáhcújtsómeke. <sup>25</sup> Muuráhjáa Críjtodívú pájaabe dííbyé tujpácýó wágóóóvéneri méimítyú ímíbáávye pámeere dííbyeke mecáhcujtsómé mewágóóóvéiyónetu mepájtyetéki. Téhdurée téeneri ímíbájchoobe méíhdé múnáaúvú dííbyeke úráávyehíjcyámé ímityuháñé éjjuúvú íáábúcu híjcyáne. <sup>26</sup> Ehdu néénetu méwaajácú Píívyéébe íjcyaduré ímiáábé íjcyane. Áánéllí ímiáámedi dílloobe ímí Jetsóoke cáhcújtsómeke.

<sup>27</sup> Aane íñe ¿íveekí mémítyájkímyeíiyáhi? ¿Aca meere meímíbáávye meke Píívyéébe ímiáámedi díllóhi? Tsáhaá. Muurá ihdyu Jetsóoke mecáhcújtsónetúré meke ímiáámedi dílloóbe. <sup>28</sup> Tsá teene dííbyé taúhbaju meúraávyérómeke díbye ímiáámedi díllóityuróne.

<sup>29</sup> ¿Aanéhaca íñe apáámyéré mee jodíómuke pájtyetésóííbye? Tsáhaá. Muurá téhdure jodíómú íjcyátúrómeke pájtyetésóííbye. <sup>30</sup> Muurá tsáápiye Píívyéébeé. Tsá tsijpi íjcyatúne. Aabe dílló ímiáámedi dííbyeke ímiááné cáhcújtsómeke pamévakéré mee jodíómuma jodíómú íjcyátúrómeke. <sup>31</sup> Áronáa idyé tsá dííbyé taúhbaju

mewáágootú dibyée mééma mepájtyetéiñe Jetsóoj téeveri méénune mecáhcújtsóné hallúhcuri. Muurá ihdyu téénej téeveri éhníñevu ímí méúraavyé teéne.

## 4

### *Aavaráadítýú íjcyáné uwááboju*

<sup>1</sup> Cáhawáá méijtsúcunu muhdúhjáa nétsihdyu méihdé múnáajpi Aavaráaúvuke ímiáábedi Píivýéébe díllone. <sup>2</sup> Tsáháa dibye ímí íjcyánéllii ímiáábedi dibye díllotúne. Tehdúu tene nééca muurá tééneri mítyájkímyeíyoóbe. Áronáacáa ihdyu Píivýéébere píáábónéllii tsá dibye mítyájkímyeítyúne. <sup>3</sup> Muurá dííbyé waajácúháámitu nééneé: “Aavaráa Píivýéébeke ímí cáhcújtsónéllii ímiáábedi dííbyeke dílloóbe.” Ehdu nééne Píivýéébé waajácúháámitu. <sup>4</sup> Aane muurá tsaatéké diityé wákímyeí áhdó maájcutu tsá pevénéré maájcutú meímíllénema. Muurá ihdyu diityé wákímyeí áhdóré máajcúhi. <sup>5</sup> Ahdu muurá Píivýéébe tsá meke ímiáámedi díllotú meere ñná ímiááné íjcyane meméénúnéllíihye. Ímiáámedi meke dílloobe apááñéré méimítyutúu meke dibye ímíjpyetétsóné mecáhcújtsómeke. <sup>6</sup> Ehdúhjáa muurá dibye méénune Dabíiúvú iwáájácúne néé ñne ímí méénútúrómeke dibye ímiáámedi díllome ímí íjcyane. <sup>7-8</sup> Illúhjáa muurá neébe: Maímijyu ditye íjcyane Píivýéébe diityédí ñdáátsóvéne ímítyú diityédítýú wáágóomé hallurí ñná íjcyájúcootúme. <sup>9</sup> ¿Aanéhaca ñne apáámyéré mee jodíómú ímí méíjcyáahi? Tsáhaá. Muurá téhdure jodíómú

íjcyáturómé ímí íjcyááhi. Aavaráaúvúhjáa muurá ímí Píívyéébeke cáhcújtsónéllii dííbyeke ímiáábedi dílloobe. <sup>10</sup> ¿Aanéhacáa mújyútú ímiáábedi dílloobe dííbyeke? ¿A díbyée dííbyeéjpi íjcyáné uubállé kíhdyahírótsámeíñé boonétu? Tsáhaá. Teenéikyée díbye méénúmeítyúné íhdéjuco díbye ímiáábedi díllone díbye ímí cáhcújtsónéllíihye. <sup>11</sup> Áané uubállée bóónétúí kíhdyahírótsámeíbye. Áanéllii diíbye ídyéjúcéejpi kíhdyahírótsámeítyurómé ímí Píívyéébeke cáhcújtsómeke ímiáámedi díbye díllómedítyu. <sup>12</sup> Téhdure kíhdyahírótsámeímyé ímí Píívyéébeke cáhcújtsómedítyú ídyéjúcéejpi diíbye Aavaráaúvú díbyéhjáa ímí cáhcujtsódú dítye cáhcújtsónéllíihye.

### *Aavaráa Píívyéébeke cáhcujtsóne*

<sup>13</sup> Píívyéébéhjáa muurá dííbyeke néé pámeere dííbyej tsíménémúúháábema diítyéké ííñujívú íájcuíñé ímí díbye dííbyeke cáhcújtsónéllíihye. Tsáháa Píívyéébé taúhbaju néhdu íjcyánéllii díbye téené piáábó újcutúne. <sup>14</sup> Muurá dííbyé taúhbaju néhdu meíjcyáne j tééveríyé meke díbye piááboca bañúháñé Críjto dsíjívéné mécáhcújtsóiyáhi. <sup>15</sup> Muurá íllure teene taúhbaju méhdivu neetsó méimítyuvu. Teene íjcyátuca tsá ñná méhdivu néétsóítyuróne.

<sup>16</sup> Áanéllii Aavaráakéhjáa íájcuíñé Píívyéébe néené piáábó téhdure méújcuú íñe múhdumé dííbyeúvúj tsíménémúhaabe meíjcyame Píívyéébeke mecáhcujtsóme. Tsá ínehjí meméénúnetu meújcúityú teéne. Muurá pámeere múhdumé

dííbyeúvúu Píívyéébeke ímí cáhcújtsódú cáhcújtsómé újcuú téené piáábo. Áánéllii diibye Aavaráaúvú idyéjúcóejpi Píívyéébeke mecáhcújtsómedítu. <sup>17</sup> Téénetúhjáa muurá Píívyéébe nées íwaajácúháámitu: “Uke ó meménú mítyame míamúnááj caanídýu u néébe ímichi diityé déjúcóejpi u íjcyaki.” Ehdúhjáa neebe dííbyedítýú panévaturé íhtsútuube íjcyaaabe dsíjívemeke bóhítsóóbeke dibye cáhcújtsoóbe. Áhduréhjáa cáhcújtsoobe dííbyedítýúu míamúnáake illíyaatétsoíñé dibye nééne tenéi pánéévétúrónáaaca.

<sup>18</sup> Ávyetáhjáa múha cáhcújtsóityuróné cáhcújtsoobe Aavaráa Píívyéébeke. Árodújucóhjáa dibye íjcyane pámeere múhdumé Píívyéébeke cáhcújtsómedítýú idyéjúcóejpi. Téénetúhjáa idyé neebe dííbyeke: “Úhdityu llíyaaténé míamúnáa mítyame íjcyáahi.” <sup>19</sup> Ehdúhjáa dibye nééne cáhcújtsoobe ‘muhtsi metsíímávácóóíñejíí’ néétuubéré keeméjuco 100 pijcyábá íjcyáróóbeúvu. Téhduréhjáa mewa Tsáára tsúúca itsíímávályotsíhjí pájtyérónáa cáhcújtsoobe dityétsí tsíímávaíñé Píívyéébe nééneé. <sup>20</sup> Ávyetáhjáa ímiááné dííbyema tene pánééveíñé íwáájácúne íhdere téené hallúvú dííbyeke téhdújtsoobe dúúrúvaabére. <sup>21</sup> Muuráhjáa ímiááné waajácuube Píívyéébe íhtsútuube íjcyaaabe íñéhdu méénuíñe. <sup>22</sup> Ehdúhjáa ímí dibye cáhcújtsónéllii Píívyéébe dííbyeke ímiáábedi dillóhi.

<sup>23</sup> Áronáacáa tsá apáábyeúvúré ímí cáhcújtsónéllii dibye dííbyeke ímiáábedi díllone cáátúvatúne.

24 Téhdurée caatúváné Máavyéjuubée Jetsóoke bóhítsóóbeke mecáhcújtsómeke idyé dibye ímiáámedi díllóíne. 25 Muuráhjáa Jetsóó dsíjivé mewájyuri méimítýú iwáágóoki. Áábekée Píívyéébe bóhítsó dííbyej tééveri ímiáámedi meke idíllóki.

## 5

### *Píívyéébe ímiáámedi meke díllone*

1 Muurá ímiááné Píívyéébeke mecáhcújtsómeke díllóobe ímiáámedi. Tsáhájuco múhdurá meke dibye íjtsúcunútú Máavyéjuubée Jetsocríjtó tsúuca méimítýú mééma ímíbájchónéllííhye. 2 Muurá teene mecáhcújtsónej tééveri Píívyéébe meke píaabó tsaímíyé dííbyema meíjcyaki. Áánéllíi méwaajácú dííbyeéjté meíjcyámeke dibye ávyéjútsoneri meímíjyúúvéíne. 3 Téhdure méímíjyúúvéiyá meícúbáhrámeíyóneri. Muurá ténehji panévare máaabúcu híjcyá ímiááméré meíjcyaki. 4 Áánetu méwaajácú ímí Píívyéébeke meuráávyémema ínéhdújuco dibye méénuíne. 5 Ááneri tsá menúcójpívétsámeítyú dibye meke báñúítyúnéllííhye. Muurá méwaajácú dibye meke wájyune Íapííchó méíbuúúné pañévú dibye pícyóónej tééveri.

6 Muuráhjáa méimítýú déjúcotu mewágóóóvéiyónetu tsá meere mepájtyetétsámeítyuróne. Áronáacáa Críjto dsíjivé pámeere ímityúmé meíjcyáme wájyuri meke ípájtyetétsoki. 7 Tsá muurá múha ímílléítyuró tsíjtye wájyuri ídsíjívéne. ¿Mityá íjcyámé tsaate

ímiáábé íjcyáábeke ipájtyetétso dsíjívéiyóme?  
 8 Áronáacáa muurá Píívyéébe Críjtoke wallóó dibye  
 ɔdsíjíve ímityúmé meíjcyáromeke ipájtyetétsoke.  
 Ááneríi meke úújétsoobe mítyane meke iwájyune.  
 9 Áánéllii meke díllloobe ímiáámedi dibyée  
 mewájyuri dsíjívénej tééveri. Aame dííbyej  
 tééveriyé mepájtyeté dibye meke ícúbáhráiyónetu.  
 10 Muuráhjáa Píívyéébema tsá meíjcyáítyuró  
 ímityúmé meíjcyánéllíihye. Áronáacáa Ílli Jetsocríjtó  
 mewájyuri dsíjívéneri méimíbaavyéjucóó dííbyema.  
 Aame méwaajácú mepájtyetéiñe dibye mépañe  
 íjcyánéllíihye. 11 Ááneri méimíjyúú Críjtóo mééma  
 ímíbájchónej tééveri ímí Píívyéébema meíjcyáneri.

### *Adáa tútávajtsóné Críjto ímíbajchóne*

12 Muuráhjáa tsáápihdítyuré ímityúné ííñujívú  
 ípívyeevéne tsówayúcú pámeere míamúnáake.  
 Átsihdyúu íjcyane íñe médsíjívehíjcyá ímityúmé  
 meíjcyánéllíihye. 13-14 Muuráhjáa Píívyéébé  
 taúhbajúi íjcyátúnáa tsúúca míamúnáa ímityúmé  
 ícyahíjcyá Adáaúvudítyú Moitséeúvudívújuco íjcyáné  
 míamúnáa. Áromé hallúríhjáa tsá ñná íjcyatú  
 dityée muhdú meíjcyáiyóné Píívyéébe ímilléné  
 wáájácútúnéllíihye. Áronáacáhjáa dsíjívehíjcyámé  
 Adáaúvúu méénudu néené ímityú méénúturóme.  
 Aanée muurá ímichi dííbyedítyú íjcyane pámeere  
 míamúnáake tútávajtsódú íívane téhdure Críjto  
 dsíjívéneri pámeere míamúnáa ímíjpyetéjucóó  
 múhdumé teene cáhcujtsóme.



15 Muuráhjáa diibye Adáaúvú Píivýéébe dííbyeke bóijcyúné lléébótúné déjúcotu íñe pámeere míamúnaa médsíívehíjcyáhi. Áánélliihyéhjáa ihdyu Píivýéébe meke ídaatsólléne Ílli Jetsocríjtoj tééveri meenú mepájtyetéíñe. Aane tsá ínehjí meméénúneri mepájtyetéítyuróne. Apááñéré dííbyeke mecáhcújtsóneri mepájtyetéhi. 16 Aanée dííbyeúvú ímityúné méénúné déjúcotu pámeere ímityúmeréjuco meíjcyame méwágóóóvéiyáhi. Áronáacáa Píivýéébe mééma ímíbaajchóhi. Áánéllii apááñéré ímiááné dííbyeke mecáhcújtsómeke dílloobe ímiáámedi ímityúmé meíjcyarómeke. 17 Muurá méwaajácú tsáápiiyée ímityúné méénúné déjúcotu pámeere meímítyuuvémé mewágóóóvéiyóne. Téhdure méwaajácú Píivýéébe Jetsocríjtoj tééveri ímiáámedi meke díllome dííbyé avyéjuri meíjcyaiñé múijyú dsííjvéítyúmeréjuco. 18 Tsúúcajáa mééma ímíbaavyéné tsaapi ímiáábé íjcyáábej tééveri Adáaúvú ímityúné méénúné déjúcotu pámeere wágóóóvéiyóne.

19 Muuráhjáa tsáápi lleebótú níjcaúvú íñe ímityúmé meé. Áhdurée idyé tsáápiiyee ímiáábé íjcyáábej tééveri Píivýéébe dílló ímiáámedi dííbyeke cáhcújtsómeke.

20 Muuráhjáa dibye teene muhdú meíjcyáiyóné taúhbaju pícyóónej tééveri éhnííñevu méwaajácú ímiááné ímityúmé meíjcyane. Aane ehdu menéérómeke dibye ídaatsóllénetu méwaajácú mítyane meke dibye wájyune. 21 Aanée ímiááné ímityúmé meíjcyáné déjúcotu pámeere

méwágóóóvéiyáhi. Áronáacáa Píívyéébe mítyane meke iwáýjúnéllii ímiáámedi díllome tsúúca méujcú medsíjívéjúcóóityúne bóhí Máavyéjuube Jetsocríjtoj tééveri.

## 6

### *Críjtokéréjuco meúraavyéne*

<sup>1</sup> ¿A ehdu Píívyéébe meke mítyane wáýjúnéllii tsá meíhvetéityú ímityúné meícyahíjcyánetu díbye meke éhniíñevu iúújétsó muhdú meke iwáýjune? Tsáhaá. <sup>2</sup> Tsúúca muurá téénetu méijchívyé ímiáámeréjuco méijcyaki. Ahdícyane tsáhájucó tsiíñe meméénúityuró teene ímityúné tééneejte méijcyájúcóótúnéllíihye. <sup>3</sup> ¿Aca tsá ámuha mewáájácutú mépée Jetsocríjtoéjteréjuco méijcyané uubállé metsójsótsámeíñe? <sup>4</sup> Muurá tééneri méúújetsó ímityúnéjcutu dsíjívemédú méijcyane. Téhdure tééneri ménaavénú Críjtóo dsíjívéébeke Píívyéébe íihnáhoori bóhíitsoobe tsíhdyuréjuco íjcyadu ícyooca tsíhdyuréjuco méijcyane.

<sup>5</sup> Muuráhjáa Críjto dsíjívédú íívane ímityunéhjí meíhvéjtsóhajchíí idyé díbyée bóhíhdu íívane tsaímíyéjuco méijcyaiñe Píívyéébema. <sup>6-7</sup> Muurá méwaajácú ímityúnée meícyahíjcyané tsúúca Críjto méhdityu wáágoóné páwachékevu idsíjívéneri. Áanéllii téénetu méijchivyémé tsáhájucó tééne pañe méijcyatú éhne múúne tsaapi tsaaté hójtsí pañe íjcyadu. <sup>8</sup> Aanée méhdityu Críjto idsíjívéneri wáágoónéllii méwaajácú díbye íjcyadu méijcyaiñe. <sup>9</sup> Muurá méwaajácú ípyée idsíjívénetu bóhíibe

mújyú tsiĩne dsíjívécóóityúne. <sup>10</sup> Tsáneeree dsíjíveebe páneere méimítyú iwáágóoki. Aabe icyooca ijcyá Píivyéébema tsaímíyjuco. <sup>11</sup> Ahdu dibye íjcyadu meíjcyá dsíjívemédú ímítyúné icyánéjcutu. Ááne ímiáámeréjuco meíjcyá dibye ímillédú tsúúca dííbyeéjté ámuha meíjcyame.

<sup>12</sup> Ahdícyane panévare ímítyúné ámuha meméénúyóneri méúmúúpivyéjúcohdíñe. Óvíjyacóóné tenehji ámuha meméénuhíjcyáne. Métáhjátsámeíjyúcohdí téénevu.

<sup>13</sup> Píivyéébedívuréjuco méíhvéjtsaméí ámúhakeye dibye ityúkévéjtsó tsaímíyé ámuha meíjcyaki.

<sup>14</sup> Tsá téénevu metáhjátsámeíityuró Jetsóoke mecáhcujsóme. Muuráhjáa méhdi ídáátsóvéne dsíjíveebe téenej téeveri meke íímíbájcho téénevu metáhjátsámeíjyúcóótuki. Aame meíjcyá Píivyéébé píáábó pañe. Tsáhájuco teene íhdééné taúhbájú pañe meíjcyájúcootúne.

### *Ímítyúnetu meíjchivyéne*

<sup>15</sup> ¿A ehdu tene néénéllíi éhníĩñevuré méméénúyá ímítyúne? Tsáhaá. Ílluréjuco metsu téénetu meíhvetéki. <sup>16</sup> Muurá ámuha méwaajácú tsané avyéjúúbema íjcyame dibye ímillédú íjcyane. Ahdu muurá ímítyúné pañe meíjcyame téené níjcaúvú íllure méwágóovéhi. Áánetu ihdyu Píivyéébe ímillédú meícyane ímí mééma níjkéváhi. <sup>17</sup> Ahdu icyooca meíjcyá tsúúcajáa téénetu meíjchivyémé dííbyé uwáábójú pañéréjuco. Ááne hallúvú ihdyu mítyane ó téhdujtsó dííbyeke. <sup>18</sup> Aane tsúúcajáa téénetu meíjchivyémé icyooca

ímiááneréjuco meúraavyéne. <sup>19</sup> Áánéllii teene ímíñeúvú méuráávyé íhdée ímityúné íjcyaróné ámuha meúraávyehíjcyádu. Áijyu ihdyu ámuha méjcyáá ímiááné Píívyéébeéjteréjuco. Ehdu íñe ámúhake o nées ímíñeúvú ámuha mewáájácuki.

<sup>20</sup> Muuráhjáa ámuha ímityúné pañe méjcyácooca tsá meímíletú ímiájíjtó meúraavyéne. <sup>21</sup> Ehdúu éjyu múhdurá núcójpítsó meícyahíjcyáné déjúcotu muurá méwágóóóvéiyáhi. <sup>22</sup> Árónáa tsúuca téenetu meíjchivyémé Píívyéébeéjté meíjcyame ímiáámeréjuco méjcyáiyóne. <sup>23</sup> Muurá ímityúné méenuhíjcyámé ídátsó wágóóóveé téené déjúcotu. Áánetu Píívyéébeke ímí úráávyémeke ájcúiibye múijyú ditye dsíjívéjúcúóóítyúne bóhívu Máavyéjuube Jetsocríjtoj téeveri.

## 7

### *Táábávajcátsiyu íjcyáné uwáábo*

<sup>1</sup> Ámuúha táñahbému, ámuha muurá méwaajácú tsaaté túkevéjtsójú pañe méjcyane méjcyáné hajchóta. Áánetu medsíjívéné boone tsáhájucó téené pañe méjcyatúne. <sup>2</sup> Muurá walle ityájívácooca íjcyá ájyú túkevéjtsójú pañe. Aane díbye díílledívú dsíjívéhajchíí tsáhájucó téené pañe dílle íjcyájúcootúne. <sup>3</sup> Áijyu ihdyu tsá muhdú tene néetu dílle tsíjpiikyéréjuco tájíváiyóne. Áánetu ájyu dsíjívétúnáa tsíjpiikye dílle tájíváhajchíí ávyeta ímityúné méenulle íveekí ájyu ímíubááné íjcyánáa tsíjpiima íjcyáneri.

4 Ahdu ámuha táñahbémú tsáhájucu meíjcyatú taúhbájú pañe eene walle ájyu dsíjívéné boone dííbyé túkevéjtsójú pañe íjcyájúcóótulle íjcyadu. Muurá meíjcyá Críjtóo idsíjívénetu bóhííbé uráávye múnááréjucu. Muuráhjáa mééma ímíbájchoobe Píívyéébe ímillédú meíjcyaki. <sup>5</sup> Ihdéuvúu muurá meímillédú meíjcyame ímityúné méméénuhíjcyáhi. Áánetúu teene Píívyéébé taúhbaju meke bóíjcyúrónáa éhniíñevúré méméénuhíjcyá ímityúné téené déjúcotu mewágóóóvéiyóne. <sup>6</sup> Árónáa tsáhájucu téené pañe meíjcyatúne. Aame ícyooca ímiááné meímílléne tsaímíyé Píívyéébeke méúraávvehíjcyá tsíhdyuréjucu méíjtsaméi mecápáyoovéme. Tsáhájucu taúhbaju néénélliihyéré díbye ímillédú meíjcyatúne.

### *Ímityúné méhdityu íjcyane*

7 ¿Áánélliihyéhaca teene taúhbaju ímityúne? Tsáhaá. Teene muurá ihdyu meke waajácútsó keená ímityúné íjcyanévu. Muuráhjáa tene íjcyátuca tsá o wáájácúítyuró ímityúneri meúmúúpivyéné ímityúné íjcyane. Muurá íllu néénee: “Tsá múu úmúúpívyetú ímityúneri.” <sup>8</sup> Téhdurée tene íjcyátuca tsá o wáájácúítyuró kénehjí ímityúné íjcyane. Aane o wáájácújúcóóroobe éhniíñevúré ó ímíllehíjcyá ténehjíré o méénune. <sup>9</sup> Ópée teene taúhbaju o wáájácútúné hajchótá ó itsúcunúhíjcyá ímí o íjcyane. Árónáacáhjáa ihdyu múhdurá ó dáríívémehíjcyáhi. Ááné níjcaúvúhjáa o wágóóóvéiyóné tsúúca ó waajácúhi. <sup>10</sup> Píívyéébé teene ítaúhbaju mééma meenu tsaímíyé dííbyema

meíjcyároki. Áronáacáhjáa tehdu o íjcyátúné déjúcotu ó wágóóóvéiyáhi. <sup>11</sup> Ópée ó íjtsúcunú ímí tehjújuco o ícyahíjcyáne. Áronáacáa téénej tééveri ó waajácú ímityúné o ícyahíjcyáné déjúcotu íllure o wágóóóvéiyóne.

<sup>12</sup> Áronáa tsá ímityúné teene taúhbaju íjcyatúne. Muurá ímí tehjújuco teene ímiáájú íjcyane.

<sup>13</sup> Aane ¿íveekí o wágóóóvéiyonévú oke tene wáájácútsónáa ó nehíjcyá ímiáájú tene íjcyane? ¿Mityá ímityuube o íjcyanévé tene oke wáájácútsótuca tsá o wágóóóvéityuróne? Áánerá ihdyu ó wágóóóvéiyá tahllííñé táimítyú déjúcotu. Muurá teene taúhbaju ímiáájú íjcyaróné méhdivu bóhówajtsó méimítyu.

<sup>14</sup> Aane méwaajácú teene Píívyéébedítyuré tsááneé. Áronáa óhdityuré íjcyane ímityúné pañe ó ícyahíjcyáhi. <sup>15</sup> Aabe tsá o wáájácúmeítyú muhdú o íjcyane. Ímiáánéré o méénune o ímíllérónáa ímityúnéré ó méénuhíjcyá o méénúityuróne.

<sup>16</sup> Aane ímityúné o méénuhíjcyánetu ó waajácú ímiááné Píívyéébé taúhbaju néhdu o íjcyaca ímí o íjcyáiyóne. <sup>17</sup> Áronáa teene ímityúné tápañe íjcyané oke íbúwajtsóneri ó méénuhíjcyá teene.

<sup>18</sup> Aane ó waajácú ímiááné ímityuube o íjcyane. Ó imíllehíjcyará ímiáánéré o méénune. Áronáa tsá o méénuhíjcyatúne. <sup>19</sup> Ááne ímityúné o méénúityurónéré íveekíhjáubá ó méénuhíjcyáhi.

<sup>20</sup> Áronáa ihdyu téénere tápañe íjcyane oke íbúwajtsóneri teene ó méénuhíjcyáhi.

21 Íllu muurá ó ícyahíjcyáhi: Ímíáánéré o méénúíyócooca ímityúnéré óhdivu dsínévahíjcyáhi.

22 Ó imíllehíjcyará Píívyéébé taúhbaju néhdu o íjcyane. 23 Áronáa ímityúné íjtsaméí tápañe íjcyane oke tútávátsohíjcyáhi.

24 ¡Aabe máidáátsoju ehdííváiibe o íjcyane! ¿Aanéhaca íñe múha oke pájtyetétsoó ehdu o ícyahíjcyané nájcaúvú o wágóóóvéiyónetu?

25 Muurá íjcyaaabe Píívyéébe apáábyéré tsúúca téenetu Máavyéjuube Jetsocríjtoj tééveri oke pájtyetétsoobe. Áánéllii mítyane ó téhdútsohíjcyá dííbyeke. Aabe ihdyu óvíi ícyooca ó íjcyá díbye ímillédu. Áronáa táimítyú tápañe íjcyane oke pátsáricyohíjcyáhi.

## 8

### *Píívyéébé Apííchó meke túkévéjtsóne*

1 Muurá Críjtoéjité íimillédu íjcyájúcootúmé Píívyéébé Apííchó túkevéjtsó pañéréjuco íjcyámé hallurí tsá ñná íjcyatúne. 2 Aane muurá

Jetsocríjtoéjpi o íjcyáne j tééveri Píívyéébé Apííchó tsúúca tápañe íjcyánéllii tsáhájucó ímityúné pañe o íjcyatúne. Aabe tsáhájucó o wagóóóvéityúne.

3 Muuráhjáa ítyaúhbaju meúráávyerómé mepájtyetéityúrónéllii Íllíkye wálloobe mehdu néébe dsíjívénej tééveri méhdityu méimítyú iwáágóoki. 4 Ehdúu mééma méénuube muhdú teene taúhbaju néhdu meíjcyaki. Aame tsáhájucó meímillédu meíjcyatú Píívyéébé Apííchoréjuco meke túkévéjtsóné pañe meíjcyánélliihye.

5 Muurá ímillédúré íjcyame tééneríyé tsúúrámeíhijcyáhi. Áánetu íhdyu Píívyéébé Apííchó túkévéjtsóné pañe íjcyame tsúúrámeí díbye ímillédú íjcyáíyóneri. <sup>6-7</sup> Muurá meímillédú meícyahíjcyáneríyé metsúúrámeímyé ílluréjuco metútávaavéne. Ááneríyé muurá tsúúrámeímyé tsá ímíletú Píívyéébema ímí íjcyáíyóne. Aame tsá ávyejúúletú dííbyé taúhbaju. Áánetu díbye ímillédú meíjcyáíyóneri metsúúrámeímyé tsáímíyé dííbyema meíjcyáhi. <sup>8</sup> Muurá ímillédúré ícyahíjcyámé tééneríyé itsúúrámeíñéllii tsá Píívyéébe ímillédú íjcyatúne.

<sup>9</sup> Aane óví ímiááné Píívyéébé Apííchó túkévéjtsó pañe ámuha meíjcyáhajchíí tsáhájucó íhdée ámuha meícyahíjcyádú meíjcyatúne. Muurá Íapííchovu Críjto meke ájcune ípañe íjcyatúmé tsá dííbyeéjté íjcyatúne. <sup>10</sup> Muurá médsíjiveé méimítyú déjúcotu Críjtoéjté meíjcyaróme. Árónáa tsá muhdú meíjcyáityú tsúúca Píívyéébe meke ímiáámedi díllónéllííhye. <sup>11</sup> Aane ímiááné mépañe Íapííchó íjcyáhajchíí muurá téhdure meke bóhíitsóíibye Jetsóokée íbóhiitsódu.

<sup>12</sup> Ahdícyane tsáhájucó meímillédú meíjcyáityúne, ámuúha táñahbé muj. <sup>13</sup> Muurá tehdu meícyahíjcyáné meíhvéjtsótúhajchíí méwágóóóveéhi. Áánetu Píívyéébé Apííchó piáábori teene metáhjáhajchíí mépájtyéteéhi.

<sup>14</sup> Muurá íñe múhdumé tééne túkévéjtsó pañe meíjcyame ímiááné dííbyej tsíímé meíjcyáhi. <sup>15</sup> Aane teene mépañe íjcyame dííbyeke mecáánivámé



ménéhíjcyáhi: “Llihíyo múúháj Caánij.” Áánéllii tsá dííbyedi menúhnevéityuróne. <sup>16</sup> Ehdu Píívyéébé Apííchó mépañe íjcyáneri méwaajácú ímiááné dííbyej tsíímé meíjcyane. <sup>17</sup> Aane tsúuca dííbyej tsíímé meíjcyame Crijtóo ícúbáhrámeídyú meícúbáhrámeímyé dííbyema máávyéjúúteé Cáánii dííbyeke nééné avyéjuri. <sup>18</sup> Muurá ímiááné meícúbáhrámeíhijcyámé íiné imíjyaúrjúco meíjcyaiñé Píívyéébé avyéjuri. <sup>19</sup> Páneere muurá dibyee ípívyejtsóné téhmehíjcyá múijyú dibye ihñéjteke ávyéjújtsoíñe. <sup>20</sup> Muuráhjáa páneere dibye ípívyejtsóné tútávaavé dibye ímillédúre. <sup>21</sup> Áronáa ihdyu ímíbaávyeiñéi ítsíime meíjcyámeke dibye tsíhdyuréjuco ímíjpyetésóijyu. <sup>22</sup> Muurá páneere dibyee ípívyejtsóné tsá ímí néétune. Aane téhmehíjcyá múijyú ímíbaávyeiñé éhne múúne walle ítsíimáváné boone ímíbaávyeiñé téhmehíjcyádu. <sup>23</sup> Áronáa tsá apááñéré teene ícúbáhrámeítyúne. Téhdure mee tsúuca Píívyéébeéjté meíjcyámé pañe Íapííchó íjcyarómé méícúbáhrámeíhijcyáhi. Aame téhdure météhmehíjcyá ítsíímedíi meke idíllómeke dibye tsíhdyuréjuco ímíbájchoíñe. <sup>24</sup> Ehdu méúmiwa néene mecáhcújtsohájchíí mééma pánééveíñé tehdújuco. Muurá tsane meítsohíjcyáné tsúuca maájtyúmícooca ílluréjuco meíhveténé meíjtsohíjcyánetu. <sup>25</sup> Áánetu meítsohíjcyáné maájtyúmítúné hajchótá tsá meíhvetétú meíjtsónetu.

<sup>26</sup> Muurá meíhnháhoótúnéllii Píívyéébé Apííchó

meke píáábohíjcyá panévare maáábúcuki. Muurá meere píáábó dííbyeke muhdú metáúmeítyúrónéllii téenere wáájácúratúné mépañétú ihjyúvahíjcyáhi. <sup>27</sup> Aane Píívyéébe pámé íjtsaméiyé wájácú néébe waajácú ñná dííbyé Apííchó mépañe íjcyane taúmeíñe. Muurá táúmeíhijcyáné ihñéjté meíjcyámé hallúvú dibye ímillédú meíjcyaki.

*Ihñéjteke Píívyéébe píaabóne*

<sup>28</sup> Muurá méwaajácú panévare meke pájtyénej téeveri Píívyéébe meke píaabóné ímiáané dííbyeke mewájyúmeke tsúúcajátújucóo ipítýájcámeídyú meke újúcumeke. <sup>29</sup> Muuráhjáa tsúúcajátújuco dibye meke wáájacúné ihñéjté meíjcyame Íllídyu menééímyeke. Aame cahcújtso múnaa meíjcyámedítyú diibye Ílli ímichi ídyéjúcóejpi. <sup>30</sup> Ehdúu tsúúcajátújuco meke iwáájácúmeke dibye ímiáámedi díllone dííbyé avyéjúejte meíjcyaki.

<sup>31</sup> Áanéllii Píívyéébe mééma ijcyá meke ipíááboki. Aanéjii ¿múha muhdú meke méénúiyáhi?

<sup>32</sup> Muuráhjáa Íllíkye wájýútuubéré íhvejtsó mewájyuri dibye idsíjíveki. Aabéjii muhdú tsá meke panévatúré píáábóityúne. <sup>33</sup> ¿Mityá ijcyámé tsaate dibyéé meke újcume mewágóóóvéiyóné néémeé? Muuráhjáa tsúúca dibye ímiáámedi meke díllómé hallúrí tsáhájucó ñná íjcyatúne. <sup>34</sup> Aanéjii ¿múha nééjuri méwágóóóvéiyáhi? Muuráhjáa Críjto mewájyuri idsíjívéne bóhíibe ícyooca íavyéjuri Píívyéébé úníuri íjcyabe máhallúvú táúmeíhijcyá píáábo. <sup>35</sup> Áanéllii dibye meke wájýúmeke

tsá ñná dííbyedítú dówajcáróityuróne. Muurá meícúbáhrámeíyonéhji, mávaríjchoháñe, ájyabááne, mewájamúúvátunéhji, ápíchó nééronéhjí, téhdure dsíjívé íjcyaróné tsá meke dówajcáróityuró dííbyedítú. <sup>36</sup> Muurá Píívyéébé waajácúháámitu nééneé:

Dihñéjté muha meíjcyáné hallútú múúhakyé dsíjívétsohíjcyáiyómé éhne múúne obééjámuke ditye dsíjívetsódu.

<sup>37</sup> Ehdu ápíchó nééronéhjí métáhjahíjcyá Jetsocríjtó meke wájuúúbej tééveri. <sup>38-39</sup> Aane muurá ó waajácú Píívyéébe meke wájuúmeke ñná dííbyedítú meke dówajcáróityuróne. Muurá dsíjívé íjcyaróne, bóhíime ííñújí hallurí meíjcyaróne, níjkyéji múnaa íjcyaróme, naavémú íjcyaróme, ííñújiri íhtsútujte ávyéjajte íjcyaróme, ícyooca tééne pañe meíjcyarónéhji, bóónétu meke pájtyéíñéhji, téhdure caame íévéhóowari íjcyánéhjima ííñújiri íjcyarónéhjí tsá meke dííbyedítú dówajcáróityuró Máavyéjuubée Jetsocríjtoj tééveri díbye meke iwájuune úújétsómeke.

## 9

### *Píívyéébe ijraéémuke ihñéjtedívú mémenúne*

<sup>1</sup> Aane Críjtoéjpi o íjcyánéllii ámuha cáhcújtsótúmeke o néé ímiááne mítyane ámúhadi o ídáátsovéné ímityúne ámúhá hallurí íjcyáneri. <sup>2</sup> Tápañe Píívyéébé Apííchó íjcyane waajácú teene múhduúvúrá o íjtsúcunúne ídátsó o íjcyane. <sup>3</sup> Muurá ámuha tamúnaa ámúhá imítú

déjúcotu mewágóóóvéíyónéllii ámuhákye o wáýjúne oore Crijtodítýú ó wágóóóvéíyá ehdu o méénúneri ámuha mepájtyetéca. <sup>4</sup> Muurá Píívyéébe meke tsúúca ítsíímedi díllorómé tsá dííbyeke melléébohíjcyatú Ijraééj tsííménémúhaabe meíjcyaróme. Áronáa ihdyu méwáábyutáro dííbyé avyéju. Áanélliihyéhjáa muurá méénuube muhdú meíjcyáíñé pityájcójuma taúhbaju. Áhduréhjáa neebe dííbyeke medúúrúvahíjcyámeke tsaímíyé meke ipícyooíñe. <sup>5</sup> Muuráhjáa méíhdé múnáaúvúj tsííménémúhaabe Crijto míamúnáajpi tsííjú icyánéjcutu. Aabe páné avyéjuube ijcyá Píívyéébe múijyú níjkéváityúné dúúrúvámeíhíjcyaaabe.

<sup>6</sup> Áronáa Píívyéébé mééma imyéénuíñé nééne tsá tsaate méhdityu cáhcújtsotú díityéjúcooro Ijraééj tsííménémúhaabe meíjcyarómedítýu. ¿Íhya mityá pamévare dííbyéjté meíjcyátúnéllii tsá ditye cáhcútsohíjcyatúne? Muurá itsúcunúhijcyámé ípyée íñéhdu díbye méénutúné tsúúca díbye méénújúcooróne. <sup>7</sup> Muuráhjáa tsá pámeekéré Aavaráaúvúj tsííménémúháábeke díbye wábyújtsotú díityéj tééveri míamúnaa pájtyétéíñe imyéénuíñe. Íllúhjáa muurá neebe dííbyeke: “Daachi Itsaadítýú llíyaatémé íjcyáá páñétúejte díjtsííménémúhaabe.” <sup>8</sup> Ehdu néénetu méwaajácu ímiáané díibye Aavaráaúvúj tsííménémúhaabe íjcyarómé pámeere Píívyéébejté íjcyatúne. Muurá ihdyu ípyée íñéhdu díbye dííbyeke ájcuube Itsáaúvudítýú llíyaatémé páñétúejte dííbyéj tsííménémúhaabe. <sup>9</sup> Íllúhjáa muurá neebe dííbyeke:

“Ámuhtsikye o néene éévé úújetéijyu dítyáaba tsíímávaá wájpiíkye.”

<sup>10</sup> Ehdúhjáa muurá Píívyéébe diityétsikye néhdújuco tene páneevéné diityétsima. Aanéhjáa diityétsí hajchi méíhdé múnáajpi Itsáadívú mewa Rebécá tsíímavá míityétsikye tsaijyúre. <sup>11-12</sup> Aanéhjáa dilléi diityétsikye tsíímavátúné íhdéjuco Píívyéébe néene díílleke: “Ámíáábé ehnííñevu bónebe avyéjuúhi.” Ehdúhjáa neebe diityétsikye muhdú dityétsí íjcyaiñé diityétsimái tene pánéévétúrónáa íhgyáa ipítýajcámeidyújuco. <sup>13</sup> Téenetúréhjáa muurá idyé íllu neebe tsiíñe íwaajácúháámitu: “Jacóóboké ó wajyú Etsaóoke o wájyúné ehnííñevu.”

<sup>14</sup> ¿Áánélliihyéhaca ímítyuube diibye Píívyéébeé? Tsáhaá, tsá ímítyuube díbye íjcyatúne. <sup>15</sup> Íllúhjáa muurá téhdure neebe Moítséeúvuke: “O ímíllémedi o ídáátsóvémeke ó píááboóhi.” <sup>16</sup> Tsá muurá méhdityu tene íjcyatú Píívyéébe méhdi ídáátsovéne. Muurá ihdyu iiye ityújkevééllémedijyucó díbye ídáátsovéne. <sup>17</sup> Muuráhjáa Ejíhtó avyéjuube Paraóóúvuke idyé neebe: “Oorée uke ávyéjúúbedívú ó picyóó uke pájtyénéhjitu pámeere ííñújiri íjcyané míamúnaa iwáájácu ímíááné íhtsútuube o íjcyane.” Ehdúhjáa Paraóóúvuke neebe Píívyéébeé. <sup>18</sup> Aabe ímíááné ityújkevééllémedi ídáátsóvéne píaabóhi. Áánetu tsaate illéébone ímíllétúmeke pícyoobe ditye íimíllédú íjcyaki.

<sup>19</sup> Árónáacáubá tsaate nééiyáhi: “Díbyere meke pícyohdújuco meíjcyámeke ¿íveekí nehíjcyaa

ímityúmé meíjcyane?” Áronáa tsá mee míamúnaa Píívyéébe iwáájacúdú méénune múhdurá meíjtsúcunúityuróne. <sup>20</sup> ¿Aca muutá mee dííbyema metáhájcatsíki? ¿Aca núpájkííhló nééiyá téíhlóo níjcyómeke íveekí múhdurá ditye níjcyone? <sup>21</sup> Muurá núpájkityu nícyohíjcyámé piivyété páhduvaré íimillédú íñíjcyone. Piivyétémé ímiááné wáábyuta íñíjcyone. Áhdure piivyétémé átérééné wáábyuta íñíjcyone.

<sup>22</sup> Muurá Píívyéébe íimilléduré aabúcu híjcyá dibye wáágóoímé múhdurá ícyahíjcyanéhi. Ehdu aabúcu híjcyaaabe díityéj tééveri iúújétsó íihtsútuu, ícyaayóbaa, íjcyane. <sup>23</sup> Áánetu tsúúca dibye méhdi ídáátsovémé meíjcyá dííbyé avyéjújte tsúúcajátújucóo meke dibye újcume. Ehdu méénuube mejtééveri íavyéjú íhtsútú iúújétsoki. <sup>24</sup> Muuráhjáa ihdyu dííbyere meke ujcú íavyéjújte meíjcyáímyeke jodíómudítuu, jodíómú íjcyátúmedítuu, íjcyane. <sup>25</sup> Íllúhjáa muurá dibye nééne Otséa caatúnúhi:

Tahñéjté íjcyátúné míamúnaa ídátsó íícúvératúmé ícyahíjcyámeke ó újcuú tahñéjteréjuco ditye íjcyaki.

<sup>26</sup> Téhdure tsiíne nééneé:

Tahñéjté íjcyátúrómeke áátsíímedíyéjuco o díllóíñé ímiáábé Píívyéébe o íjcyaaabe.

<sup>27-28</sup> Áánetúhjáa Itsaía néé mee íjraéémudítuu: “Píívyéébe íícúiyéjuco muhdú míamúnaa íñújiri ícyahíjcyané ímíbájchócooca Íjraééj tsííménémúhaabe ávyétá mityámé íjcyárómedítúú uhjéméré pájtyéteéhi.” <sup>29</sup> Áhduréhjáa tsiíne neébe:

Páné ihdéene íjcyáné avyéjuube íjcyaaabe  
 Píívyéébe méhdi ídáátsóvétuca tsúúca  
 meke waagóoyá tsaaté coévaratu éhnée  
 Tsodóómaa, Gomóóraa, íjcyácoomícyu  
 múnáake imyéénudu.

*Jodíómú tsá cáhcújtsotú Jetsóoj tééveri  
 mepájtyeténe*

<sup>30</sup> Aane ¿aca muhdú íñe teéne? Muurá  
 jodíómú íjcyátúrómeke tsúúca Píívyéébe dilló  
 ímiáámedi éjyúu ténéhji éllevu íjcyatúmé botsíi  
 dííbyeke cáhcújtsórómeke. <sup>31</sup> Áánetu mee  
 ijraéémú métsúúráméíhíjcyará dííbyé taúhbaju  
 meúraavyémeke dibye meke ímiáámedi díllóiyóneri.  
 Árónáa tsá meke dibye díllotú ímiáámedi. <sup>32</sup> Aane  
 ¿íveekí tsá meke dibye díllotú ímiáámedi? Muurá  
 méjtsúcunúhijcyá teene taúhbaju meúraávyénetu  
 dibye meke ímiáámedi díllóiyóne. Árónáa tsá  
 tene néhdu meíjcyatúne. Áhdure Jetsóópe mééma  
 méénune mecáhcújtsótúnéllii tsá dibye meke  
 díllotú ímiáámedi. Íllure mébáñúmeíhijcyá éhne  
 múúne nééwáyutu mecábóhcámeíúdú néébeke  
 mecáhcújtsótúnéllíihye. <sup>33</sup> Íllu muurá Píívyéébe néé  
 íwaajácúháámitu:

Tsióo múnáa pañévú ó pícyoó tsáápiikye éhne  
 múúne nééwáyutu mecábóhcámeímyé  
 maáákityéúdú néébeke. Áábeke cáhcujtsómé  
 tsá íñerí báñúmeíityúne. Ehdúhjáa Píívyéébe  
 néehíí.

## 10

<sup>1</sup> Ámuúha táñahbému, ó imíllé memúnaa jodíómú pájtyeténe. Áánéllii ávyétá iñnáhó piáábó diityé hallúvú ó táúmeíhijcyá Píívyéébeke. <sup>2</sup> Ímiááné imíllerómé dííbyeke iúraavyéne. Árónáa tsá ímí ditye úráávyetúne. <sup>3</sup> Tsá ditye cáhcújtsotú Críjtóo mewájuryi dsíjívéné mecáhcújtsómeke ímiáámedi dibye díllone. Imíllerómé iye ímí ijcyáiyóné diityéké ímiáámedi dibye idílloki. <sup>4</sup> Árónáa tsá dííbyé taúhbaju meúraávyémeke dibye ímiáámedi díllotúne. Muuráhjáa ihdyu Críjto mewájuryi dsíjívéné mecáhcújtsómeke dílloobe ímiáámedi.

<sup>5</sup> Árónáacáhjáa ihdyu Moitséeúvú nées ímiááné Píívyéébé taúhbaju néhdu ijcyámeke dibye ímiáámedi díllóiyóné ditye ipájtyetéki. Árónáa tsá múha ávyeta tene néhdu ijcyáítyuróne. <sup>6</sup> Áánéllihyée Críjtoj téeveri mepájtyetéíñe dibye méénune mecáhcújtsómeke ihdyu dílloobe ímiáámedi. Aane tsá múu íjtsámeítyú Críjtoke níjkyéjé pañe iñéhcotéiyóné dibye meke ipiááboki. <sup>7</sup> Áhdure tsá múu íjtsámeítyú níjkyéné pañe dííbyeke iñéhcotéiyóné dibye meke ipiáábo tehdu téhulle ijcyácóóbekéjívvari. Muurá tsúuca méema dííbye. <sup>8</sup> Íllu muurá téénetu nééneé: “Tsúuca ámúhama ijcyájúcooróné pajtyeté teene ámuha mecáhcújtsóne tsíjtyeke meúúbálléiyóne.” Aane muurá muha mecáhcujtsómé íñe méúwáábohíjcyáhi. <sup>9</sup> Muuráhjáa Jetsocríjtó dsíjívéébeke Píívyéébe bóhiitsóné méííbúuri mecáhcujtsómé dííbyeke maávyejúúlléne teene



tsíjtyeke meúúballéhajchíí mépájtyéteéhi. <sup>10</sup> Muurá ímiááné mééíbúuri mecáhcujtsóné tsíjtyeke meúúballéhajchíí ímiáámedi meke dibye díllome mépájtyéteéhi.

<sup>11</sup> Muurá dííbyé waajácúháámitu nééené: “Dííbyeke cáhcujtsómé tsá íínerí bañúmeítyúne.”

<sup>12</sup> Ahdícyane pámeere tsííné míamúnáama mee jodíómú Jetsocríjtoke mecáhcujtsómé mépájtyéteéhi. Muurá tsáápiiye pámé avyéjuubéré íjcyabe píáábohíjcyá pámeekéré dííbyedi tsúúrameímyeke. <sup>13</sup> Íllu muurá nééené: “Dííbyedi tsúúrameímyé pájtyéteéhi.”

<sup>14</sup> Áronáa ¿aca múhduú dííbyedi tsúúrameíyómé dííbyeke cáhcújtsómejíívari? Áhdure ¿múhduú cáhcújtsóiyómé dííbyeke wáájácúmejíívari? ¿Kíátú waajácúiyómé teene dííbyedítyú íjcyané uwááboju múha díityéké úúbállémejíívari? <sup>15</sup> Áhdure ¿múhduú tsaate díityéké úúbálléiyá múha díityéké téénevu pícyóómejíívari? Muurá Píívyéébé waajácúháámitu nééené: “Maímijyu díitye ímiáájú úúbálléhíjcyámej.”

<sup>16</sup> Ehdu Píívyéébé waajácúháámitu tene néérónáa muurá tsá pamévaré téeneri íícúvehíjcyatúne. Muuráhjáa Itsaíaúvú néehíí: “Píívyéébéj, ¿a íjcyámé tsaate méuwáábori íícúvehíjcyámej?” <sup>17</sup> Aane muurá Jetsocríjtodítyú íjcyané uwááboju melléébone ímíñeúvú mewáájácúcooca tsúúca mecáhcujtsóhi.

<sup>18</sup> ¿A tééné uwááboju tsáhái múijyú mee íjraéémú melléébotúne? Áánerá tsúúca melléébohíjcyaráhi.

Muurá tsiíñe Píívyéébé waajácúháámitu nééené:  
Tsúúca pahúllevávú ííñújiri tsújaavéné Críjtodítýú  
Íjcyané uwááboju.

19 Ehdu Píívyéébé waajácúháámitu nééronéubá  
¿mityá tsá mewáájácutúne? Muuráhjáa dííbyere  
Píívyéébe néé íllu Moitséeúvuj tééveri:

Tsííñe míamúnaakéréjuco o pájtyetésóneri  
ámuha menómítááváne díityédívú  
mécyóbááváteé átéréejte ditye Íjcyane ámuha  
meítsúcunúhíjcyárómedívu.

20 Áhduréhjáa idyé tsiíñe dííbyeúvuj tééveri neébe:  
Oke wáájácútúné míamúnaa táábúwá Íjcyáturómé  
tsúúca tahñéjté íjcyáhi.

21 Áhduréhjáa mee íjraéémudítýú Isaíaúvuj  
tééveri neébe: “Ó nehíjcyará aatye lléébópítýúné  
míamúnaake ditye ookéréjuco iúráávyeki.”

## 11

### *Tsaate íjraéémú pájtyeténe*

<sup>1</sup> ¿Aanéhaca ehdu menéénéllii meke íhvéjtsoobe  
Píívyéébeé? Tsáhaá. Muuráhjáa oo ámuha múnáajpi  
Aavaráaúvuj tsíménémúhaabe ímichi Bejamíí  
dohjíba múnáajpi o Íjcyáábeke újcuúbe. <sup>2</sup> Tehdu  
meke íhvéjtsóiyóóbejíí tsúúcajátújucóhjáa íhñéjté  
meíjcyaiñé íñéémeke. <sup>3</sup> Muuráhjáa Eríaúvú  
néehíí: “Píívyéébeéj, díhjúyú uubálle múnáake  
ídsíjívétsóne díícúvé waijíné wácávyáhcohíjcyáme.  
Áánetu íñe apáábyeréjuco o Íjcyáábeke téhdure  
oke dsíjívétsóllehíjcyáme.” <sup>4</sup> Ehdúhjáa díbye  
Píívyéébeke nééronáa neébe: “Áronáa muurá

ijcyámé 7,000-meva tahñéjté ijcyame ‘Baáa’ némeíñé níjcyotáábeke cáánívahíjcyatúme.” Ehdúhjáa Píívyéébe néé Eriáúvuke. <sup>5</sup> Aane muurá ijcyámé tsaate méhdityu díbyéé ídáátsóvéne újcume ímí dííbyeke úráávyehíjcyáme. <sup>6</sup> Muuráhjáa meke iwáýjúnéllii meke pájtyetétsoóbe. Tsáháa ínehjí meméénúnéllii mepájtyetétúne. Muurá meere mepájtyetétsooméícyá tsá díbye meke wáýjúnéri mepájtyetetíyuróne.

<sup>7</sup> Muurá mee ijraéémú mepájtyetetíyóneri meíjyácunúrómé tsáhái mepájtyetétúne. Áronáa ijcyájucóomé tsaate díbye újcume tsúuca pájtyetéme. <sup>8</sup> Áánetu dííbyé waajácúháámitu dííbyeke lléébohíjcyátúmedítýú nééneé: “Píívyéébere diityé íjtsaméí mújtatsó dítye íajtyumíjúcooróné iwáájácútuki. Áhdure illéébójúcooróné dítye icyáhcuíjtsótuki. Aame muurá téhdupíyé ícyoóca.” <sup>9</sup> Áhduréhjáa Dabíúvú nééhií:

Óvi dítye náhbévácatsíhíjcyáné wañéhjíné dahpédú nééne diityéké mújtatsó ímí Píívyéébema dítye íjcyátu diityémá ímítýú tene iníjkévaki.

<sup>10</sup> Óvi ijcyámé éhne múúne hállúvatúmé íjcyadu ímítýuháñé diityéké mújtatsómé ímíbáávyétuki.

Ehdúhjáa neebe Dabíúvu.

### *Jodíómú íjcyáturómé pájtyeténe*

<sup>11</sup> ¿Anéhaca íñe ávyéta mújtaréjuco mee jodíómú Píívyéébedítýú meméénune? Tsáhaá. Muurá ihdyu dííbyere Píívyéébe nééjuri ehdu mééma teene jodíómú íjcyatúmé tééné hóowari pájtyeténetu

meíiváne botsíi téeneri metsúúrameiki. <sup>12</sup> Ehdu Píivýéébeke melléébotúmé ímityú meijcyaróné píaabó tsíjtyeke jodíómú íjcyátúmeke. Aanéjii awáá muurá dííbyeke meúraávyécooca éhniíñevu píááboíñé pamévakére.

<sup>13</sup> Aane ícyooca diitye jodíómú íjcyátúrómeke o néehíi: Ámúha éllévúu oke Píivýéébe wallóo ámúhakye dííbyé uwáábojúvú o wáájácútsoki. Áané wákimyéi o méénune ímí ó ijsúcunúhi. <sup>14</sup> Aane tsáijyu múu íñe ámúhakye o úwáábóneri ímí ámuha meijcyane tsaate tamúnáadítýú ííténe ámuhádú ímíjpyeté ipájtyeteki. <sup>15</sup> Muuráhjáa múúhakye múu íhvejtsódú Píivýéébe méénúné hóowari tsíjtye múnaa ámuha meijcyarómé méímíbaavyé tsaímiyéjuco dííbyema ámuha meijcyaki. Aanéjii muurá muha dííbyema méímíbaávyécooca mébóhííteé tsúúcajáa dsíjívemédú muha menéérome.

<sup>16</sup> Muurá tsáoobíráutu pááaho meméenuho ímí néhajchíi páneere ímíhyeé. Áhdure úméhe bájkyé ímí néhajchíi páheere ímíhyeé. Áhdúu muurá méíhdé múnáajpi Aavaráaúvú Píivýéébeéjpi íjcyánéllii téhdure mee dííbyedítýú mellíyaatémé méijcyá Píivýéébeéjté íñe múhdumé dííbyeke mecáhcujsóme.

<sup>17</sup> Muuráhjáa páñétúehe oríívóhé wajcánédú muuha jodíómú menéérómedítýú tsaatéké waagóoobe diityéjúcooro páñétúejte ihñéjté muha meijcyarómedítýu. Áámé cápáyóóvée ámúhakye díbye újcume ámuha méijcyá éhne múúne bájú oríívóhe wájcá ímiááhetu mecámahjácódu. Áánéllii muurá ámuha téhdure Píivýéébeéjté íñe muha

meíjcyadu. <sup>18</sup> Áronáa ihdyu méjtsúcunúmeídí muha páñétúejte meíjcyáromé ehniíñevu ámuha meíjcyane. Muurá múúhadítyú ámuha mééjécunú éhne úmehe tébajkyéjitu éjécunúdú ímichi tujkénúejte muha meíjcyánélliíhye.

<sup>19</sup> Íhya mityá ámuha menéehíí: Diityéjúcooro páñétúejte íjcyáromeke íhvéjtsóne meekéréjuco díbye újcune diityé cápayóóve. <sup>20</sup> Ihdyúhdée tehdújuco múúhake díbye íhvejtsóné muha mecáhcújtsótúnélliíhye. Áámé cápayóóvéé ámúhake újcuube ímí dííbyeke ámuha mecáhcújtsónélliíhye. Aame téííbúwá meíjcyá. Mémitýájkímyeídí tééneri. <sup>21</sup> Muuráhjáa páñétúejte ihñéjte muha meíjcyáromedi ídáátsóvétuubéré múúhake íhvejtsóhi. Aabe téhdure ámúhadi ídáátsóvéiyónejíí ímityú ámuha dííbyema meíjcyáhajchííju. <sup>22</sup> Muurá Píívyéébe ímiáábé dííbyema ímí meíjcyámema. Áánetu ímityú meíjcyámeke múhdurá íjtsúcunúube. Áánéllií ímiááméré méjcyaco tsúúcajáa ámúhake díbye újcume. Ímí ámuha meíjcyátúhajchíí tsáhájucó ámúhadi díbye íícúvéityúne. <sup>23</sup> Muurá tamúnaa ímbáávyéhajchíí diityéké újcúííbye. Muurá piivyéteebe tsiíñe diityéké íjcune. <sup>24</sup> Muuráhjáa ámuha tsííñé míamúnaa meíjcyáromeke díbye újcume ámuha méjcyá éhne múúne bájú oríívóhe wájcá ímiááhetu cámaavédu. Aanéjéíí muurá tamúnaa ímichi awáá ihñéjte íjcyámeke tsiíñe újcúííbye.

*Nihñéré ijraémú pájtyeténe*

<sup>25</sup> Ámuúha táñahbému, ó imíllé ámuúhake o úúballéné muhdúhjáa mepájtyetéiñe Píívyéébe wáájácúratúné Críjtoj tééveri méénune. Ároné tamúnaa tsá cáhcújtsotú tééné hóówari ámuha tsííñe múnaa dííbyeke cáhcujtsómé mepájtyetéki. Ááneri ihdyu mémítýájkímyeídíñe. <sup>26</sup> Muurá téhdure tamúnáadi ídáátsóvéne píáábóiibye ditye ipájtyetéki. Muurá dííbyé waajácúháámitu nééneé: Tsióo múnaa ijraéémudítýú íjcyáiíbye tsaapi diityéké pájtyetétsoóbe. Aabe waagóoó diityé imítýu. <sup>27</sup> Ehdu diityéké ó ímíbájchoó ópée o néhijcyádújuco.

Ehdu néene Píívyéébé waajácúháámitu.

<sup>28</sup> Aane tamúnaa jodíómú tsaríllé Críjtóo mepájtyetéiñe méénúné uwááboju téénej tééveri ámuha jodíómú meíjcyátúrómeke téhdure Píívyéébe ipíááboki. Árónáa ihdyu tsá dibye íhvéjtsoturó múúhake. Muurá mítýane múúhake wájuube múúhá íhdé múnáaúvukée íhñéjtedívú imyéménúnéllíhye. <sup>29</sup> Aabe íñéhdú imyéénúnéllí tsá íhñéjteke íhvéjtsotúne. Téhdure meke ipíaabóné tsá dibye dójtúcutúne. <sup>30</sup> Áábekée muurá tsá ámuha melléébohíjcyatúne. Ahdu muurá icyooca tamúnaa téénej tééveri dibye ámuúhadi ídáátsóvéne ipíááboki. <sup>31</sup> Ááné boone téhdure ámuúhadí ídáátsóvédú diityedí ídáátsóvéne píáábóiibye ditye icyáhjútsoki. <sup>32</sup> Muurá dííbyere Píívyéébe meke pamévá míamúnáake íhvejtsó dííbyema múhdurá meíjcyá pámehdíyé méhdi ídáátsóvéne tsahtúré meke ipíááboki.

33 Aabe íhtsútuube íjcyaaabe panéváré wáájácuube muhdú meke túkévétsohíjcyáné mewáájácúíyonévú tsá méjtsaméí úújetétúne.  
 34 ¿Mityá íjcyámé tsaate dííbyé íjtsaméivu úújetémej? ¿A íjcyámé tsaate dííbyeke úwaabóiyóme?  
 35 ¿A íjcyámé tsaate tsíeménevu ditye dííbyeke ájcúnéllii téené píaméí dibye píáábohíjcyáme?  
 36 Muuráhjáa ihdyu páneere dííbyere Píívyéébe ípívyejtsóné dííbye tájpiyé íjcyáhi. Áané avyējuube dííbye. Ahdícyane metsu dííbyeke maávyéjútso paíjyuvaré múijyú níjkéváityúne. Ehdu teéne.

## 12

### *Píívyéébé túkevéjtsójú pañe meíjcyane*

1 Ahdícyane, ámuúha táñahbémuji, Píívyéébe mítyane meke ídaatsóllénéllii ámuúhake o néé dííbyedívú ámuha meíhvéjtsámeíñe dííbyé túkevéjtsójú pañéréjuco ámuha meíjcyame dííbyeke meúraávye muhdú dibye ímillédu. Ehdu muurá ámuha meíjcyáneri dííbyeke méduurúváiyáhi. 2 Tsá múu íjcyájúcootú íñe íjñiri míamúnaa múhdurá ícyahíjcyádu. Mécapayóóvé ámuhá íjtsaméí ámuha mewáájácu tsaímíyé meíjcyáiyóné Píívyéébe ímilléne.

3 Muuráhjáa meke ídaatsóllédú íjcyaaabe oke picyóó ámuhá uwááboobe o íjcyaki. Aabe ámuúhake o néé ámuha meíjtsúcunúmeítyu panéváré ámuha mewáájacúne. Múu ímíñeúvú íjcyáne íjtsaméí dííbyeke icyáhíjtsóneri. 4 Muurá méjpi pívátsihjívá íjcyane tsá tsané wáábyutaré íjcyatúne. 5 Ahdu

Críjtoéjté pívámeva meíjcyarómé tsáápihdyuré menéeme mépiáábócatsíhijcyáhi.

<sup>6</sup> Áámekée Píívyéébere íimillédú meke ájcúneri mépiivyété páhduváré nénehji meméénune. Áánéllii tehdu nénehji méméénuhíjcyá ímíñeúvú meíjtsámeíñema. Muurá tsaate iná pájtyeíñé íhdéjuco iwáájacúné úúbállehíjcyámé tehdujuco úúbállehíjcyané dííbyeke icyáhcujsódú íjcyame.

<sup>7</sup> Áhdure tsíjtyeke ipíaabóné píívyetémé múu ímíñeúvú píaabóhi. Áhdure iúwaabóné píívyetémé múu ímíñeúvú úwaabóhi. <sup>8</sup> Áhdure múhdurá néemeke ímíjpyetétsóné píívyetémé múu ímíñeúvú meenúhi. Tsáneetu píhtómeke ipíaabóné píívyetémé múu píaabó pájúvatúmére. Tsaatéké ityúkëvejtsóné píívyetémé múu ímíñeúvú túkévejtsóhi. Ídáátsómeke ipíaabóné píívyetémé múu píaabó ímíjyuuri.

### *Muhdú Críjtoéjté íjcyáiyóne*

<sup>9-10</sup> Ámúhake o nées ámuha mewájujycatsí pamévamáyé muhdú tsané nahbémú wájujycatsídyu. Ááne máavyéjúúllecátsí panévátúre. Ímítyúneri íícúvetúmé ímiáánéré méuráávye ímí ámuha meíjcyaki.

<sup>11</sup> Óvéheetúmé ímíñeúvú meméénú Píívyéébeke ámuha meíícúvéné wákimyéi.

<sup>12</sup> Aame múu ímíjyúú ímí ámúhá úmiwa néénéllíihye. Ícúbáhrámeíyóné múu iáábúcúne óóchévetúmé pájjuváre ihjyúvahíjcyá Píívyéébema.



13 Áhdure tsijtye dílbyeéjté íjcyámeke mépiáábohíjcyá ditye píhtónéhjitu. Ámúhakyé ááhívémeke múu tsaímíyé waatsúcúhi.

14 Tsaate ámúhakyé tsárílléromeke tsá múu tsáríllétúne. Íllure múu diityé hallúvú piáábó táúmeí Píívyéébeke.

15 Áánetu ímíjyúúmema múu téhdure imíjyúúhií. Kímóóveri íjcyámema múu kímoovéhi.

16 Mépiáábojcatsí ímíñeúvú pájúvatúmére. Tsá múu iye iéllevu ávyéjuuháñé ipíúváne ‘mityáhmityá’ néétune. Múu pamévamáyé tsahtúré nahbéváhi. Tsá múu íjtsúcunúmeityú pámé ehniíñevu iwáájacúne.

17 Tsaate ámúhakyé ímityúné méénúmeke tsá múu piámeityúne. Múu ímiáánéré meenú ímí ditye ámúhakyé íjtsúcunúki. 18 Tsaímíyé meijcyá pamévamáyé úhbájcatsityúme. 19 Ámuúha táñahbémej, tsaate ímityúné ámúhakyé méénúhajchíí tsá múu íjyácunútú diityéké iáhdó iújcúíñeri. Múu íhvejtsó Píívyéébere muhdú iwáájacúdú diityémá ímíbájchoki. Muurá dílbyé waajácúháámitu nééneé: “Ooréi ó ícúbáhraá ímityúné ámúhakyé méénúmeke. Ehdu o néé Píívyéébe o íjcyáábe.” 20 Áhdure idyé tsiíñe nééneé: “Ámúhakyé múnáájtsórómeke mépiáábó panévátúre. Ditye ájyabáávatéhajchíí múu májchotsóhi. Ditye iádóiyóneri íjcyáhajchíí múu ijchóhi. Ehdu ámuha diityéké tsaímíyé meíícúvéhajchíí muurá ílluréjuco ditye núcójpíveíñé ámúhakyé íñéhníllehíjcyáneri.” Ehdu

muurá meke úwaabóné Píívyéébé waajácúháámitu.  
 21 Ahdícyane ímityunévú métáhjátsámeidíñe. Múu  
 ímiááméré ijcyáíyóneriyé tsúúrámeí ímityúné  
 ámúhake idyómájcótuki.

## 13

1 Múu avyéjuullé pámeere méiiñújí avyéjujtéke.  
 Muurá Píívyéébere diityéké pícyoome ijcyá  
 patsihjivári. 2 Aame nééne lléébotúmé muurá tsá  
 Píívyéébeke avyejúúllétúne. Aane ehdu néémeke  
 tééné hallútú ícúbáhraímyé diitye avyéjujte.  
 3 Árómedi ímí meijcyame tsá meíllityétúne. Áánetu  
 ímityúné méénuhíjcyámé diityéké illíhi. Aane  
 ámuhá hallurí ímityúné ijcyátu ímiááméré meijcyá  
 muhdú diityé taúhbajúúné néhduú. Áijyu ímí ámuha  
 méijcyaáhi. 4 Muurá Píívyéébere pícyóó diityéké  
 téénevu diityé túkevítso pañe ímí meijcyaki.  
 Áánéllii ímityúné méénuhíjcyámé diityéké  
 illíhi. Muurá tsá pevéneré ditye úvanútyuró  
 ímityúné méénúmeke. 5 Áánéllii múu avyéjuullé  
 diityéke. Tsá múu ditye ámúhake ícúbáhráiyóné  
 apííchoriyé avyejúúllétúne. Múu avyéjuullé diityéké  
 muhdú Píívyéébeke maávyejúúllédú díibyerée  
 diityéké pícyóónéllíihye. 6 Ááne ñná néétuméré  
 mááhdohíjcyá méiiñújí avyéjúúbé wáabyuta ditye  
 áhdótsohíjcyané Píívyéébere diityéké pícyóómé  
 túkevítso pañe meijcyaánéllíihye.

7 Múu pamévakeré ajcú diityé wáabyuta íjcyanévu.  
 Áhdure ámúhake píáábó táúmeímyeke mépiáábo.  
 Méiiñújí avyéjujte meke áhdotsóné múu diityéké  
 iávyejúúlléne áhdóhi.

8 Tsá múu tsaatédítýú iñáhjíhenúné áhdotúmé íjcyatúne. Múu áhdójucóohí. Muurá Píívyéébé taúhbaju néhdu meíjcyame tsíjtyeke méwajyúhi. Imíllebe muurá pamévamáyé mewájyújcatsíñe. 9 Muurá dííbyé taúhbajúúné néehí: “Tsá múu ihdícyáméhjima dómácójcatsítýúne. Tsá múu dsíjívétotú míamúnáake. Tsá múu nánívatúne. Tsá múu állíuutúne. Tsá múu ímítýúneri úmúúpívyetúne.” Ehdu Píívyéébé taúhbajúúné néhdu meíjcy tsiíñe íllu nées dííbyé taúhbaju: “Pamévakeré múu wajyú muhdú u wájyúmeídyu.” 10 Muurá ímiááné pamévake mewájyume tsá múijyú ímítýúné meméénúítýuróne. Aane tehdu meíjcyame meíjcyá dííbyé taúhbaju néhduú.

11 Áánéllii metsu meíjcy téeibúwá muhdú díbye ímillédu. Tsúuca muurá piíhíne mepájtyetémé tsíhdyuréjuco meímíbbáavyeíñe. 12 Muurá ímítýúné meícyahíjcyáné tsúuca nijkévaríjyuco. Áánéllii óvíjyacóóné tehdu meícyahíjcyáne. Métsu metsúúrámeí muhdú ímí meíjcyáíyóneri téenetúréjuco mebóhówaúcunúki. 13 Métsu panévatúré ímiááméré meíjcy ímítýúnetu menéétsámeítýuki. Óvíjyacóóné mewañehjívaténé pañe mellíyícyávehíjcyáne. Áhdure óvíjyacóóné ihdícyáméhjima medómácócatsíhíjcyáne. Óvíjyacóóné menéhnílléjcatsíñe menómíutáávahíjcyáne. 14 Métsu Ávyéjuube Jetsocríjtodívuréjuco meíhvéjtsámeí díbye meke túkévejtsómé ímí meíjcyaki. Óvíjyacóóné meímillédú meíjcyane.

# 14

## *Tsá meihjyúvái tyuró ménahbémudi*

<sup>1</sup> Tsaate Píivýéébeke cáhcújtsoromé ímí dííbyé uwááboju wáájácútúmema tsá múu táhjácatsítýú téeneri. Tsaímíyé múu nahbévájcatsí diityéma.

<sup>2</sup> Muurá ijcyámé tsaate pamévakéré dóómeé. Áánetu ijcyámé tsijtye Píivýéébé uwááboju ímí wáájácútúmé pamévakéré idyóóiyóné múhdurá íjtsúcunúne pevéne májchóré májchome.

<sup>3</sup> Aane panévare dóóme tsá múu múhdurá íjtsúcunútú tsijtye ténehji dóótune. Áhdure panévare dóótume tsá múu íhjúvatú panévare dóómedi. Muurá idyé diityéké Píivýéébe wajyú téhdure ihñéjté íjcyámeke.

<sup>4</sup> ¿Aca muutá mee muhdú Píivýéébeke tsijtye úráávyéneri meihjyúvaki? Óví ihdyu dííbyere néé ditye muhdú íjcyane. Tsáijyu múúne ímí ijcyáme, ¿mityá tsáhaáj? Muurá ihdyu dííbyere piivýeté diityéké ipiaabóné ditye ímí íjcyá muhdú íjcyáiyódu.

<sup>5</sup> Muurá ijcyámé tsaate kéjcoojí dííbyeke idyúúrvahíjcyané éhnííñevu ímí íjtsúcunúme. Áánetu ijcyámé tsaate pajcóójivaré idyúúrvané ímí íjtsúcunúme. Aane ihdyu óví ímíllejcoójí dííbyeke dúúrvahíjcyámé téjcoojí duurúváhi.

<sup>6</sup> Áhdure panévare dóóme óvi dóóhií. Áánetu panévare dóótume óvi tsá dóótune. Muurá pevéne májchó íjcyaróné hallúvú Píivýéébeke téhdujtsóme. Áhdure tsijtye téhdujtsó dó hallúvu. Ááneri muurá pámeere tsahdúré ávyéjutsó dííbyeke.

7 Tsá muurá meere meímillédú meíjcyatúne. Muurá Píívyéébere meke picyóó dííbyeke mebóhówájtsoki. Aame médsíjívé díbye ímílléjyu. 8 Muurá mebóhííné hajchótá meíjcyá dííbyé hójtsiri. Aame medsíjívécooca téhdure tsá kiávú dííbyedítýú mepéétune. Muurá dííbyemáyé meíjcyá dííbyeéjté meíjcyánéllíihye. 9 Téénéllíihyée muurá Críjto dsíjíveebe tsiíne bohííhií. Aabe muurá téhdure dsíjívétúméi dííbyé cahcújtso múnaa íjcyámé avyéjuúbe. Áhdure dííbyé cahcújtso múnaápe íjcyame tsúúca dsíjívéjúcóomé avyéjuube dííbye.

10 Aanéjii tsá múu ámúhá nahbémú cahcújtso múnaa múhdurá íjcyáneri íhjúvatúne. Tsá múu diityé piivyétetu néétune. Muurá pámeere mépíhcyááveé Críjtodívú díbye meke íñéé ímíááné muhdú meícyahíjcyáne. 11 Muurá Píívyéébé waajácúháámitu nééneé:

Píívyéébe o íjcyáábeke pámeere míamúnaa iwáájácúne táúmíwávú ímíh móúbáne oke duurúvaáhi.

12 Aane muurá pámeere méúúballeé dííbyeke muhdú meícyahíjcyáne meke díllóijyu.

*Tsá ménahbémuke metútávájtsóityúne*

13 Áánéllíi tsá múu tsaate múhdurá íjcyáneri íhjúvatúne. Métsu ímíááméré meíjcyá ménahbémú Píívyéébeke cáhcújtsoónetu diityéké metútávájtsótuki. 14 Muurá Críjtoéjpií o íjcyaaabe ó waajácú panévareé medóórone muhdú néétune. Árónáa tsaate panévareé medóóne ímityúné

íjtsúcunúmé óvi tsá dóótune. <sup>15</sup> Aane teene dóótúmeke ámuha medóóneri métútávajtsóhajchíi muurá tsá ámuha diityéké mewájurytúne. Áánéllii múu té#búwá ijcyá ámuha tsaatéké memújtátsótu téhdurée diityé wájuryi Crijto dsíjívemeke. <sup>16</sup> Aame tsáma ménéétsámeídí tehújúcooro néerone ámuhadívú ímityú ítsúcunúhíjcyámedívu. <sup>17</sup> Muurá Píívyéébe avyéjúejte meíjcyame tsá apááñéré méjpi téene tájpi íjcyáneri metsúúrameíityuróne. Téhdure metsúúrameíiyá díbye Íapííchó mépañévú pícyóónej téeveri ímíjyuuri tsaímíyé meíjcyáíyóneri. <sup>18</sup> Ehdu muurá Jetsocrijtoke meúraavyéné Píívyéébe ímí íjtsúcunúhi. Téhdure míamúnaa ímí íjtsúcunúhi.

<sup>19</sup> Ahdícyane metsu dííbyeéjté meíjcyame mepíáábójcatsííyóneri metsúúrameí tsaímíyé meíjcyame dííbyeke meúraávyeki. <sup>20</sup> Áánéllii médohdí ámuhá nahbémú dóótunéhjí Píívyéébeke ditye úráávyénetu ámuha diityéké metútávajtsótuki. Tsáháturo dooháñé ímityúné íjcyatúne. Árónáa tsaate ménahbémú ímityúné íjtsúcunúné médohdí ditye ííténáa diityéké ámuha metútávajtsótuki. <sup>21</sup> Áánéllii tsá ditye dóótunéhjí medóóityuróne. Áhdure tsá maadóityuró ávyéjpacyoné diityéké metútávajtsótuki. Panévare ímityúné ditye íjtsúcunúnéhjí tsá meméénúityuró Píívyéébeke ditye úráávyénetu diityéké metútávajtsóíyónéllííhye. <sup>22</sup> Áánetu tsane ámuha meméénune ímí tehújúco ámuha meíjtsúcunúné múu meenúhi. Árónáa ihdyu tsá múu téeneri tsíjtyeke pátsáríjcyotúne. Muurá ííné ímíjyaú meíjcyá ímityúnetu ménéétsámeítyúme.

<sup>23</sup> Muurá tsaate ímityúné íjtsúcunúróné idyóhajchíí tsúuca ímityúné meenúhi. Panévaré ímityúné meíjtsúcunúróné meméénúhajchíí muurá tsúuca ímityúné mémeenúhi.

## 15

### *Tsíjtyeke mepíaabóne*

<sup>1</sup> Aane tsúuca ímí Píivyeébeke mecáhcujsómé metsu mepíáábo eene dííbyeke cáhcújtsorómé múhdurá ítsúcunúhíjcyámeke ditye ímíñeúvú iwáájácuki. Tsá meere ímí meíjcyáíyóneri metsúúrámeítyuróne. <sup>2</sup> Áánéllii metsu mepíáábo tsíjtyeke ditye éhnííñevu ímí Píivyeébeke iúráavyeki. <sup>3</sup> Tsáháa muurá Críjto íjyácunútú iye tsaímíyé íjcyáíyóneri. Muuráhjáa dííbyeke pajtyéné Píivyeébé waajácúháámitu íllu tene néhdújuco: “Úhdi úúhívatémé óhdíjyuco úúhívatéhíjcyáne.” <sup>4</sup> Ehdúhjáa páneere Píivyeébe caatúnútsohíjcyá meke tene úwáábónej téeveri óóchévetúmé meítsohíjcyá íné imíjyaú dííbyema meíjcyáiñe. <sup>5</sup> Muurá píivyeéteebe meke ípíaabóné mávaríjchojúúné maáábúcuki. Aabe ihdyu óvíi ámúhake píaabó ámuha ímí meíjcyá panévatúré muhdú díbye ímillédú Críjtóo ícyahíjcyádu. <sup>6</sup> Aame máavyejújtsó dííbyeke Máavyéjuube Jetsocríjtó J Caaníkye.

### *Jodíómú íjcyátúrómeke ímíáájú úwáábómeíñe*

<sup>7</sup> Ímíñeúvú múu nahbévájcatsí muhdúhjáa Críjto meke náhbevádú téeneri Píivyeébeke máavyejújtsoki. <sup>8</sup> Muuráhjáa múúhá íhdé

múnáaúvuke Píívyéébe néhdújuco Críjto tsááne muuha jodíómuke ipíááboki. Áánetu méwaajácu muhdú iñéhdu ímiááné dibye méénune.  
 9 Áhdurée tsaabe ámuha jodíómú meíjcyáturómedi ídáátsóvéne dibye ámúhake pájtyetétsóné hallúvú dííbyeke ámuha medúúrúvaki. Muurá dííbyé waajácuháámitu nééneé:

Uke o ávyéjujtsóné dúúrúvaabéré ó mátsívahíjcyáá jodíómú íjcyáturómé pañétu.

10 Áhdure tsiíñe nééneé:

Pámeere jodíómuma jodíómú íjcyáturómé méímijyúúvé tsamééré Píívyéébeéjté ámuha meíjcyame.

11 Téhdure tsítsihdyu nééneé:

Pámeere panévá iñújíine múnaa máávyejújtsó Píívyéébeke.

12 Téhduréhjáa Itsaiá dííbyere Píívyéébe túkévéjtsóneri íllu caatúnúhi:

Itsaiíj tsiiménémúháábedítyú íjcyáiibye tsaapi téhdure jodíómú íjcyáturómé avyéjuube íjcyáabe. Áábedívú cátsípááveímye. Ehdúhjáa Itsaiá caatúnúhi.

13 Áhdícyane óví Píívyéébeke ámuha mecáhcújtsómeke ímijyúúvétsoobe tsaímíyé ámuha meíjcyaki, dííbyé Apííchó ámúhá pañe íjcyáne jteeveri ímí dííbyema meíjcyaiñé ámuha meíjtsoki.

14 Muurá ó waajácu dííbyé icyánéjcu tsúuca ámuha táñahbémú mewáájácúnéllí mepiáábócatsíhijcyáne. Aame ímí tehdujuco ámuha meúwáábócatsíhijcyáne. 15 Aane íñe íhyaami ámuha éllevu o cáatúnúháámí pañe ámúhake



o nées ámuha maábájíívétu muhdú Píívyéébeke meúraavyéne. Íllu íñe ámúhake ó úwáábohíjcyá iwáábyudúu múhdurá o néeróóbeke Píívyéébe oke níwaavénéjucu. <sup>16</sup> Okée muurá níwááveebe ámúhake jodíómú íjcyátúrómeké o úwáábo Jetsocriítoj téeveri mepájtyetéíñe mééma díbye méénúné uwááboju. Aane táwákimyéí íjcyabe ámúhake ó úwáábohíjcyá Píívyéébema ámuha meímíjpyeteki. Muurá dííbyé Apííchoj téeveri ámuha meímíbáávyémeke ímí íjtsúcunúíbye.

<sup>17</sup> Aane íñe Jetsocriítoéjpi o íjcyabe Píívyéébeke o íícúvéneri ó imíjyúúhí. <sup>18</sup> Muurá tajtyéeveri méénuhíjcyabe méénuráítyúronéhjí téénetu ámuha jodíómú íjcyátúrómé mecáhcújtso dííbyeke. <sup>19</sup> Ehdu ó méénuhíjcyá panévare dííbyé Apíícho piááboríye. Aane tsúuca pahúllevaré ó úwáábohíjcyá Criítoó mééma mepájtyetéíñe méénune Jerotsaréetu Iríiricó iñújívújucu. <sup>20</sup> Aane ó imíllé o úwaabóné dííbyeke waajácútúmeke. Áánéllí tsá o úwaabójúcootú tsúuca tsaate uwáábohíjcyátsíhji múnáake. <sup>21</sup> Muurá Píívyéébe waajácúháámitu nééené:

Mújyú dííbyé uubállé lléébohíjcyatúme dííbyedítú íjcyané uwááboju illéébone cáhcújtsoóhi.

### *Róómávu ipyééíñe Páávoró íjtsámeíñe*

<sup>22</sup> Ehdu íñe tsaate mújyúikyé Criítodítú íjcyané uwááboju lléébótúmedi o íjívénéllí tsá o píívyetéhíjcyatú ámúhake o ááhíveténé mítyane o imíllérónáaaca. <sup>23</sup> Árone íñe múhdúne píjcyájucó ámúhake o ájtyúmíyóneri o íjyácunúhíjcyabe tsúuca ó níjkéva íllé iñújíñe múnáake o

úwáábónetu. <sup>24</sup> Aabe Ejpááñá iĩnújivu o péécooca ámuhakye ó aahíveĩñuúhi. Átsihdyu o péébeke óví ámuha oke panévatúré mépíaabó ímí o úújetéki. <sup>25-26</sup> Áronáa tujkénúí ó úlléjeé Jerotsaréeri téhulle ménahbémú íjcyámeke Matsedóóniámá Acááyá iĩnújĩcuri íjcyáné cahcújtso múnáa píáábóne dsĩdsídívú o ájcutéébe. <sup>27</sup> Imíllémé íjcyánéjcutu ípíaabóné téhulle íjcyáné cahcújtso múnáake. Muuráhjáa ímichi diitye jodíómudítýú teene pajtyété uwááboju tsújaavéné diityédívú úújetéhi. Áánéllii tehdújuco diityéké ditye panévatúré píáábóiyóne. <sup>28</sup> Ahdícyane óví teene dsĩdsi Jerotsaréevu o pícyóhjené boonétú Ejpááñavu o péébe ámuhakye ó aahíveĩñuúhi. <sup>29</sup> Muurá ó waajácú ámuhadívú o úújetécooca meímíjyúúveĩñé mítyane Críjto meke píáábohíjcyáneri.

<sup>30-31</sup> Ahdícyane, ámuúha táñahbémuj, muurá íñe Máavyéjuube Jetsocríjtoéjté meíjcyame méwajyújcatsí Píívyéébé Apííchó meke píáábóneríye. Áánéllii ámuhakye o nées táhallúvú dííbyeke ámuha píáábó métáúmeí oke dibye ityéhme cáhcújtsótúné míamúnáa ímityúmé íjcyame oke ityútávájtsótu téhulle Jodéa iĩnújiri íjcyame. Áhdure métáuméí diitye Jerotsaréeri íjcyáné cahcújtso múnáa hallúvú ímí ditye íjtsúcunú diityé éllevu dsĩdsike o tsájtyene. <sup>32</sup> Aane óví Píívyéébe ímílléhajchíí ámuhadívú o úújetécooca ímí ménahbévájcatsíhi. <sup>33</sup> Ahdícyane óví ámuhakye píááboobe íbúwajĩí ámuha meíjcyaki. Ehdu teéne.

# 16

## *Páávoró pítyajcóné*

<sup>1</sup> Téhdure ménaalle Péébe Tséékeréá cóomiya íjcyáné cahcújtso múnáake píáábohíjcyalle ámúhakyé aahívéteéhi. <sup>2</sup> Áálleke ímíñeúvú méwaatsúcucó Máavyéjuube Jetsóo mémeri muhdú díbyé cahcújtso múnáa meíjcyame mewájujycatsídyu. Ááne mépíááboco ímíñeúvú panévatúré ñne tájpi dille íjcyáíñetu. Muurá tsaatéké ipíáábóné tsanéjcvu téhdure oke píáábohíjcyalle.

<sup>3</sup> Téhdure ámúhakyé o néé Piritsírama Akíramútsikye ámuha meúúbáalle diityétsikye o dúúruváne. Diityétsíi oke píáábohíjcyá Jetsocríjtó uwááboju o úwáábónetu. <sup>4</sup> Áhdurée oke pájtyetétsomútsí ápíchó néénetu. Áánéllii ó téhdujtsó diityétsikye. Téhdure tsijtye jodíómú íjcyatúmé cahcújtso múnáa téhdujtsó diityétsikye. <sup>5</sup> Téhdure diityétsi jávú diityétsima píhcyáávehíjcyáné cahcújtso múnáake ó duurúváhi. Téhdure táñahbévaabe Epéénetóké ó duurúváhi. Diibyée muurá Acááyá iññúji múnáadítyú cáhcújtsótujkénú Críjtoke. <sup>6</sup> Téhdure Maaríake ó duurúvá éhnée mítyane ámúhama wákímyeíhíjcyáalleke.

<sup>7</sup> Téhdure ó duurúvá tamúnáajtétsí Adoróónicómá Joníamútsikye, diityétsimáa cúvéhóójari muha meíjcyámútsikye. Diityétsíhjáa táihdéjuco cáhcujtsóné Críjtoke. Áámútsikye uwáábojte ímí ijtšucunúhi.

<sup>8</sup> Áhdure Píívyéébeéjpi tsijpi táñahbévaabe Áápiríake ó duurúváhi. <sup>9</sup> Téhdure Obáánoke ó duurúvá Jetsocríjtó uwááboju

muha meúwáábohíjcyánetu múúhake náhbénuhíjcyáábeke. Téhdure mítyane o ívameíbyeke Etáákikye ó duurúváhi. <sup>10</sup> Téhdure Apééré ímí Críjtoke úráávyehíjcyáábeke ó duurúváhi. Téhdure Arijtóóboró hájkímuke ó duurúváhi. <sup>11</sup> Téhdure tamúnáajpi Herodióoke ó duurúváhi. Natsítso hájkímú Píívyéébeéjté íjcyámeke idyé ó duurúváhi. <sup>12</sup> Téhdure ó duurúvá Tripéenamúpíke Tripóótsama téénere Píívyéébe uwááboju méénuhíjcyámúpíke. Téhdure ménaalle Péétsida tééné wákimyéí méénuhíjcyáalleke ó duurúváhi. <sup>13</sup> Téhdure ó duurúvá Róópóke Ávyéjuube Jetsocríjtoéjpi íjcyáábeke. Tsíjjuke idyé ó duurúvá ávyeta wahárodú o íjtsúcunúlleke. <sup>14</sup> Téhdure ó duurúvá Atsíícritoo, Peregóótee, Hééremaa, Paatoróóbaa, Hééremee, éhdúmema pámeere tsijtye íjcyámeke. <sup>15</sup> Téhdure ó duurúvá Piróórogo, Jóóriaa, Neréoke íñáállemaa, Oríipaa, éhdúmema tsijtye cahcújtso múnaa íjcyámeke.

<sup>16</sup> Téhdure pámeere ílle íjcyané cahcújtso múnaa ámúhake duurúváhi. Ahdícyané óví téhdure ámuha mewáájycatsíne méduurúvájycatsíhi.

<sup>17</sup> Ámuúha táñahbému, téñbúwá meíjcyá eene múhdurá íjtsaméí nééme ímí Píívyéébeke ámuha meúráávyénetu ámúhake tútávájtsóíyómeke. Muurá íñe ámuha mewáájácúné uwááboju tsíñejcúvúré úwáábohíjcyáme. Áánéllii tsá múu tehdu néémedívú píhítúne. <sup>18</sup> Tsá muurá tehdu nééme Máavyéjuube Jetsocríjtoke íícúvetúne. Muurá iiye tsaímíyé íjcyáíyóneriyé tsúúráméíhijcyáme. Aame pánehjídú íhíjyúváneerí íllure mútátsohíjcyá

ímí wáájácútúmeke. <sup>19</sup> Áronáa tsúúca mítyame waajácú ímí Píívyéébeke ámuha meúraavyéne. Ááneri ó imíjyúú mítyane. Ahdícyané óví ámuha mébóhówaúcunú ímiáánéré ámuha meméénúnetu, tsá ímítýúnetu. <sup>20</sup> Muurá Píívyéébe ámúhá pañévu picyóó ámuha tsaimíyé meíjcyáíñé íjtsaméi. Aabe ámúhama táhjaá Naavéneke ámúhakye dibye imújtátsótuki. Aane óví Máavyéjuube Jetsocríjtó ámúhakye píaabóhi.

<sup>21</sup> Téhdure ámúhakye ó úúballé táwákimyéityu oke píáábohíjcyabe Timotéó ámúhakye dúúruváne. Téhdure tsijtye tamúnaa ámúhakye duurúvá Róótsioo, Jatsóoo, Tsotsípatee, éhdume.

<sup>22</sup> Téhdure páñetu íhyaami cáátúnuube Téétsio ámúhakye duurúváhi.

<sup>23</sup> Téhdure Gááyo ámúhakye duurúvá dííbyé jari o íjcyáábe. Tééjavu muurá cahcújtso múnaa dóbéévehíjcyáhi. Téhdure ícyoomí dsíídsí tehmeébé Erájtoma ménahbe Wáátómutsi ámúhakye duurúváhi. <sup>24</sup> Aane óví Máavyéjuube Jetsocríjtó ámúhakye píaabóhi. Ehdu teéne.

### *Píívyéébeke medúúruváne*

<sup>25</sup> Ahdícyané metsu medúúruva Píívyéébeke. Diibye ihdyu píivyété ámúhakye ityúkëvejtsóné ímí ámuha meúraávye Ílli Jetsocríjtó uwááboju ámúhakye o úwaabóne. Ehdúhjáa muurá mee míamúnáake ipájtyetétsoíñé tsúúcajátújuco ñnéikyé ípívyéjtsótúnáa dibye pítyájcámeíñé tsá íhdé múnáaúvú wáájácútúne. <sup>26</sup> Árone tsúúca dííbyé ihjyú uubáalle múnaáhjáa néhdújuco panévá íñújñe

múnáake úwáábómeíñé ditye icyáhcutso díbyere Píivyéébe múijyú muhdú íjcyáítyuube néhdújuco.

<sup>27</sup> Ahdícyane metsu medúúrúva díbyeke Ílli Jetsocrítoj téeveri múijyú níjkéváityúné íhtsútuube íjcyaaabe pane wáájácúúbeke. Áyu tehdújuco.

**Píivýéébé ihju: jetsocríjyodítyú cáátúnuháámi**  
**New Testament in Bora (PE:boa:Bora)**

copyright © 2008 Wycliffe Bible Translators, Inc.

Language: Bora

Translation by: Wycliffe Bible Translators, Inc.

Boara [boa], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Bora

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

---

PDF generated using Haiola and XeLaTeX on 11 Nov 2022 from source files  
dated 29 Jan 2022

6f878dbd-e896-5e27-b788-1442926dfc48